

欽定元史

十之十卷
五三二三

元史卷三十二

明翰林學士亞中大夫知制誥兼修國史宋濂等修

本紀第三十二

文宗一

文宗聖明元孝皇帝諱圖帖睦爾武宗之次子明宗之弟也母曰文献昭聖皇后唐兀氏大德三年武宗總兵北邊帝以八年春正月癸亥生十一年武宗入繼大統至大四年武宗崩傳位于弟仁宗延祐三年丞相鐵木迭兒等議立英宗爲皇太子明宗以武宗長子乃出之居于朔漠及英宗卽位鐵木迭兒復爲丞相懷私固寵

構釁骨肉諸王大臣莫不自危至治元年五月中政使
咬住告脫歡察兒等交通親王於是出帝居于海南三
年六月英宗在上都謂丞相拜住曰朕兄弟實相友愛
曩以小人譖惄俾居遠方當亟召還明正小人離間之
罪未幾鐵失也先鐵木兒等爲逆而晉王遂立爲皇帝
改元泰定召帝于南海之瓊州還至潭州復命止之居
數月乃還京師十月封懷王賜黃金印二年正月又命
出居于建康以殊祥院使也先捏掌其衛士初晉王旣
爲皇帝以內史倒刺沙爲中書平章政事遂爲丞相狡
慢自用災異數見而帝兄弟播越南北人心思之致和

元年春大駕出畋柳林以疾還宮諸王滿禿阿馬刺台
太常禮儀使哈海宗正扎魯忽赤闢闢出等與僉樞密
院事燕鐵木兒謀曰今主上之疾日臻將往上都如有
不諱吾黨扈從者執諸王大臣殺之居大都者卽縛大
都省臺官宣言太子已至正位宸極傳檄守禦諸關則
大事濟矣三月大駕至上都滿禿闢闢出等扈從西安
王阿刺忒納失里居守燕鐵木兒亦留大都時也先捏
私至上都與倒刺沙等圖弗利於帝乃遣宗正扎魯忽
赤雍古台遷帝居江陵七月庚午泰定皇帝崩于上都
倒刺沙及梁王王禪遼王脫脫因結黨害政人皆不平

時燕鐵木兒實掌大都樞密符印謀於西安王阿刺忒納失里陰結勇士以圖舉義八月甲午黎明百官集興聖宮燕鐵木兒率阿刺鐵木兒孛倫赤等十七人兵皆露刃號於衆曰武宗皇帝有聖子二人孝友仁文天下正統當歸之今爾一二臣敢紊邦紀有不順者斬乃手縛平章政事烏伯都刺伯顏察兒分命勇士執中書左丞朵朵參知政事王士熙參議中書省事脫脫吳秉道侍御史鐵木哥丘世傑治書侍御史脫歡太子詹事丞王桓等皆下之獄燕鐵木兒與西安王阿刺忒納失里共守內廷籍府庫錄符印召百官入內聽命卽遣前河

南行省參知政事明里董阿前宣政使答里麻失里馳
驛迎帝於江陵密以意諭河南行省平章政事伯顏令
簡兵以備扈從是日前湖廣行省左丞相別不花爲中
書左丞相太子詹事塔失海涯爲中書平章政事前湖
廣行省右丞速速爲中書左丞前陝西行省參知政事
王不憐吉台爲樞密副使與中書右丞趙世延同僉樞
密院事燕鐵木兒翰林學士承旨亦列赤通政院使寒
食分典機務調兵守禦關要徵諸衛兵屯京師下郡縣
造兵器出府庫犒軍士燕鐵木兒直宿禁中達旦不寐
一夕或再徙人莫知其處乙未以西安王令給宿衛京

城軍士鈔有差調諸衛兵守居庸關及盧兒嶺丙申遣
左衛率使禿魯將兵屯白馬甸隆鎮衛指揮使幹都蠻
將兵屯泰和嶺丁酉發中衛兵守遷民鎮又遣撒里不
花等往迎帝且令塔失帖木兒矯爲使者自南來言帝
已次近郊使民母驚疑戊戌徵宣靖王買奴諸王燕不
花於山東己亥徵兵遼陽明里董阿至汴梁執行省臣
皆下之獄又收肅政廉訪司萬戶府及郡縣印庚子發
宗仁衛兵增守遷民鎮辛丑遣萬戶徹里帖木兒將兵
屯河中壬寅河南行省以郡縣闕人權署官攝其事癸
卯燕鐵木兒之弟撒敦子唐其勢自上都來歸河南行

省殺平章曲烈右丞別鐵木兒是日明里董阿等至江
陵甲辰帝發江陵遣使召鎮南王鐵木兒不花威順王
寬徹不花湖廣行省平章政事高昌王鐵木兒補化來
會執湖廣行省左丞馬合某送京師以別薛代之河南
行省出府庫金千兩銀四千兩鈔七萬一千錠分給官
吏將士又命有司造乘輿供張儀仗等物乙巳遣隆鎮
衛指揮使也速台兒將兵守碑樓口河南行省殺其參
政脫孛臺召陝西行臺侍御史馬扎兒台及行省平章
御史刺馬黑巴等諭陝西丁未撒敦守居庸關唐其勢

屯古北口命河南行省造銀符以給軍士有功者戊申
燕鐵木兒又令乃馬台矯爲使者北來言周王整兵南
行聞者皆悅帝命河南行省平章政事伯顏爲本省左
丞相河南行省遣前萬戶李羅等將兵守潼關己酉諸
王滿禿阿馬刺台宗正扎魯忽赤闢闥出前河南行平
章政事買闥集賢侍讀學士兀魯思不花太常禮儀院
使哈海赤等十八人同謀援大都事覺倒刺沙殺之庚
戌帝至汴梁伯顏等扈從北行以前翰林學士承旨阿
不海牙爲河南行省平章政事發平灤民塹遷民鎮以
禦遼東軍辛亥以燕鐵木兒知樞密院事亦列赤爲御

史中丞壬子阿速衛指揮使脫脫木兒帥其軍自上都來歸卽命守古北口癸丑鑄樞密分院印是日上都諸王及用事臣以兵分道犯京畿留遼王脫脫諸王李羅帖木兒太師朶帶左丞相倒刺沙知樞密院事鐵木兒脫居守甲寅刺馬黑巴等至陝西皆見殺乙卯脫脫木兒及上都諸王失刺平章政事乃馬台詹事欽察戰于宜興斬欽察于陣禽乃馬台送京師戮之失刺敗走丙辰燕鐵木兒奉法駕郊迎丁巳帝至京師入居大內貴赤衛指揮使脫迭出自上都率其軍來歸命守古北口戊午以速速爲中書平章政事前御史中丞曹立爲中

書右丞江浙行省參知政事張友諒爲中書參知政事
河南行省左丞相伯顏爲御史大夫中書右丞趙世延
爲御史中丞已未以河南萬戶也速台兒同知樞密院
事罷回回掌教哈的所上都梁王王禪右丞相塔失鐵
木兒太尉不花平章政事買闥御史大夫紐澤等兵次
榆林陞宜興縣爲州隆鎮衛指揮使黑漢謀附上都坐
棄市籍其家九月庚申朔燕鐵木兒督師居庸關遣撒
敦以兵襲上都于榆林擊敗之追至懷來而還隆鎮
衛指揮使斡都蠻以兵襲上都諸王滅里鐵木兒脫木
赤于陀羅臺執之歸于京師遣使卽軍中賜脫脫木兒

等銀各千兩以分給軍士有功者賜京師耆老七十人
幣帛命有司括馬中書左丞相別不花言回回人哈哈
的自至治間貸官鈔違制別往番邦得寶貨無算法當
沒官而倒刺沙私其種人不許今請籍其家徙之燕鐵
木兒請釋馬合某從之陝西兵入河中府刲行用庫鈔
萬八千錠殺同知府事不倫禿壬戌遣使祭五嶽四瀆
命速速宣諭中外曰昔在世祖以及列聖臨御咸命中
書省綱維百司總裁庶政凡錢穀銓選刑罰興造罔不
司之自今除樞密院御史臺其餘諸司及左右近侍敢
有隔越中書奏請政務者以違制論監察御史其糾言

之以高昌王鐵木兒補化知樞密院事也先捏爲宣徽使給居庸關軍士糗糧賜鎮南王鐵木兒不花等鈔有差徵五衛屯田兵赴京師安南國來貢方物賜上都將士來歸者鈔各有差樞密院臣言河南行省軍列戍淮西距潼關河中不遠湖廣行省軍唯平陽保定兩萬戶號稱精銳請發蘄黃戍軍一萬人及兩萬戶軍爲三萬命湖廣參政鄭昂霄萬戶脫脫木兒將之並黃河爲營以便徵遣從之召燕鐵木兒赴闕上都諸王也先帖木兒平章禿滿迭兒自遼東以兵入遷民鎮諸王八刺馬也先帖木兒以所部兵入管州殺掠吏民丙寅命造兵

器江浙江西湖廣三省六萬事內郡四萬事丁卯燕鐵
木兒率諸王大臣伏闕請早正大位以安天下帝固辭
曰大兄在朔方朕敢紊天序乎燕鐵木兒曰人心向背
之機間不容髮一或失之噬臍無及帝曰必不得已必
明著朕意以示天下而後可賜西安王阿刺忒納失里
鎮南王帖木兒不花威順王寬徹不花宣靖王買奴等
金各五十兩銀各五百兩幣各三十匹遣撒敦拒遼東
兵于薊州東流沙河元帥阿兀刺守居庸關上都軍攻
碑樓口指揮使也速臺兒禦之不克戊辰大司農明里
董阿大都留守關闕台並爲中書平章政事募勇士從

軍遣使分行河間保定真定及河南等路括民馬徵鄆
陵縣河西軍赴闕命襄陽萬戶楊克忠鄧州萬戶孫節
以兵守武關命海道萬戶府來年運米三百一十萬石
造金符八十已巳鑄御寶成立行樞密院于汴梁以同
知樞密院事也速台兒知行樞密院事將兵行視太行
諸關西擊河中潼關軍以摺疊弩分給守關軍士上都
諸王忽刺台等引兵犯崞州庚午命有司和市粟豆十
六萬五千石分給居庸等關軍馬遺軍民守歸峽諸隘
辛未常服謁太廟雲南孟定路土官來貢方物烏伯都
刺鐵木哥棄市朵朵王士熙伯顏察兒脫歡等各流于

遠州並籍其家同知樞密院事脫脫木兒與遼東禿滿
迭兒戰于薊州兩家店壬申帝卽位於大明殿受諸王
百官朝賀大赦詔曰洪惟我太祖皇帝混一海宇爰立
定制以一統緒宗親各受分地勿敢妄生覬覦此不易
之成規萬世所共守者也世祖之後成宗武宗仁宗英
宗以公天下之心以次相傳宗王貴戚咸遵祖訓至於
晉邸具有盟書願守藩服而與賊臣鐵失也先帖木兒
等潛通陰謀冒干寶位使英宗不幸罹於大故朕兄弟
播越南北備歷艱險臨御之事豈獲與聞朕以叔父之
故順承惟謹于今六年災異迭見權臣倒刺沙烏伯都

刺等專權自用踈遠勲舊廢棄忠良變亂祖宗法度空
府庫以私其黨類大行上賓利於立幼顯握國柄用成
其奸宗王大臣以宗社之重統繕之正協謀推戴屬於
恥躬朕以菲德宜俟大兄固讓再三宗戚將相百僚耆
老以爲神器不可以久虛天下不可以無主周王遼隔
朔漠民庶遑遑已及三月誠懇迫切朕故從其請謹俟
大兄之至以遂朕固讓之心已於致和元年九月十三
日卽皇帝位於大明殿其以致和元年爲天曆元年可
大赦天下自九月十三日昧爽已前除謀殺祖父母父
母妻妾殺夫奴婢殺主謀故殺人但犯強盜印造僞鈔

不赦外其餘罪無輕重咸赦除之於戲朕豈有意於天下哉重念祖宗開創之艱恐隳大業是以勉徇輿情尙賴爾中外文武臣僚協心相予輯寧億兆以成治功咨爾多方體予至意癸酉翰林院增給驛璽書命燕鐵木兒將兵擊遼東軍封燕鐵木兒爲太平王以太平路爲食邑賜金五百兩銀二千五百兩鈔萬錠平江官地五百頃中書右丞曹立爲江浙行省平章政事福建廉訪使易釋董阿爲右丞前中書左丞張思明爲左丞諸王塔木只兒哈郎佛寶等自恩州來朝賜按灰鈔百錠以祀天神括河東馬甲戌燕鐵木兒加開府儀同三司上

柱國錄軍國重事中書右丞相監修國史依前知樞密院事伯顏加太尉以江南行臺御史大夫朵兒只爲江浙行省左丞相淮西道肅政廉訪使阿兒思蘭海牙爲江南行臺御史大夫諸王孛羅忽都火者來朝徵左右兩阿速衛軍老幼赴京師不行者斬籍其家乙亥立太禧院以奉祖宗神御殿祠祭秩正二品罷會福殊祥兩院江西行省平章政事禿堅帖木兒江浙行省右丞易釋董阿並爲太禧院使中書平章速速御史中丞亦列赤兼太禧院使上都王禪兵襲破居庸關將士皆潰燕鐵木兒軍次三河丙子王禪游兵至大口燕鐵木兒還

軍次榆河帝出齊化門視師丁丑燕鐵木兒來見曰乘
輿一出民心必驚軍旅之事臣請以身任之卽日還宮
命司天監欒星戊寅諭中外曰近以姦臣倒刺沙烏伯
都刺潛通陰謀變易祖宗成憲旣已明正其罪凡回回
種人不預其事者其安業勿懼有因而扇惑其人者罪
之又勅軍中逃歸及京城游民敢攘民財者斬命高昌
僧作佛事於延春閣又命也里可溫於顯懿莊聖皇后
神御殿作佛事諸王阿兒八忽按灰脫脫來朝命留守
司完京城軍士乘城守禦燕鐵木兒與王禪前軍戰于
榆河敗之追奔紅橋北其樞密副使阿刺帖木兒指揮

使忽都帖木兒以兵會王禪復來戰又敗之我師據紅
橋增給大都驛馬百匹庚辰太白犯亢宿詔諭御史臺
今後監察御史廉訪司凡有刺舉並著其實無則勿妄
以言廉訪司書吏當以職官教授吏員鄉貢進士參用
加封漢將軍關羽爲顯靈義勇武安英濟王遣使祠其
廟辛巳命司天監榮星以別不花知樞密院事依前中
書左丞相括山東馬燕鐵木兒與上都軍大戰白浮之
野燕鐵木兒手刃七人于陣敗之脫脫木兒與遼東軍
戰薊州之檀子山壬午大霧王禪等遁崑山州獲上都
頒詔使者及遼東徵兵使者以聞詔誅之癸未以同知

樞密院事禿兒哈帖木兒知樞密院事中書平章政事
明里董阿爲江浙行省平章政事王禪收集散亡復來
戰我師列陣白浮之西敵不敢犯至夜撒敦脫脫木兒
前後夾攻敗走之追及于昌平北斬首數千級降者萬
餘人帝遣使賜燕鐵木兒上尊諭旨曰丞相每臨陣躬
冒矢石脫有不虞柰何自今第以大將旗鼓督戰可也
燕鐵木兒對曰凡戰臣必以身先之敢後者論以軍法
若委之諸將萬一失利悔將何及甲申慶雲見王禪單
騎亡撒敦追之不及而還命御史臺凡各道廉訪司官
用蒙古二人畏兀河西回回漢人各一人各司書吏十

六人用職官五各路司吏五教授二鄉貢進士四人本臺經歷品秩相當者除各道廉訪使都事除副使今臺譯史通事考滿不得除御史靖安王闢不花等將陝西兵潛由潼關南水門入萬戶李羅棄關走闢不花等分據陝州等縣縱兵四劫乙酉以明里董阿爲中書平章政事嶺北行省左丞燕不鄰知樞密院事募丁壯千人守捍城郭上都兵入古北口將士皆潰其知樞密院事竹溫台以兵掠石槽追封乳母完者雲國夫人其夫幹羅思贈太保封雲國公謚忠懿子鎖乃贈司徒封雲國公謚貞閔燕鐵木兒遣撒敦倍道趨石槽掩其不備擊

之燕鐵木兒大兵繼至轉戰四十餘里至牛頭山擒駢
馬李羅帖木兒平章蒙古塔失帖木兒將作院使撒兒
討溫送闕下戮之將校降者萬人餘兵奔竄夜遣撒敦
出古北口逐之脫脫木兒與遼東軍戰薊州南殺獲無
算調河南蒙古軍老幼五萬人增守京師募丁壯守直
沽調臨清萬戶府運糧軍三千五百並御河分守山東
丁壯萬人守禦益都般陽諸處海港居庸關壘石以爲
固丁亥遼東軍抵京城燕鐵木兒引兵拒之令京城里
長召募丁壯及百工合萬人與兵士爲伍乘城守禦月
給鈔三錠米三斗冀寧晉寧兩路所轄代州之鴈門關

崞州之陽武關嵐州之大澗口皮庫口保德州之寨底
天橋白羊三關石州之塢堡口汾州之向陽關隰州之
烏門關吉州之馬頭秦王嶺二關靈石縣之陰地關些
令穿塹壘石以爲固調丁壯守之戊子上都諸王忽韁
台等兵入紫荆關將士皆潰行樞密院官卜顏幹都
指揮使也速臺兒將兵援之陝西行臺御史大夫也失
帖木兒引兵從大慶關渡河擒河中府官殺之萬戶衛
里帖木兒軍潰而遁河南廉訪副使萬家閭言徹里社
木兒身爲大將紀律不嚴望風奔潰宜加重罰以示勦
懲不報河東聞也先帖木兒軍至官吏皆棄城走也失

帖木兒悉以其黨代之召雲南行省左丞相也先吉尼
不至前尙書左丞相三寶奴以罪誅其二子上都哈刺
八都兒近侍命以所籍家貲及制命還之冬十月己丑
朔命西僧作佛事燕鐵木兒引兵至通州擊遼東軍敗
之皆渡潞水走遣脫脫木兒等將兵四千西援紫荆關
調江浙兵萬人西禦潼關紫荆關潰卒南走保定因肆
剽掠同知路事阿里沙及故平章張珪子武昌萬戶景
武等率民持挺擊死數百人河南行省調兵守虎牢關
庚寅我師與遼東軍夾潞水而陣遼東軍宵遁我師渡
而襲之辛卯禮官言卽位之始當告祭郊廟社稷時享

之禮請改用仲月從之紫荆關兵進逼涿州同知州事
教化的調丁壯禦之壬辰也先捏以軍至保定殺阿里
沙等及張景武兄弟五人并取其家貲倒刺沙貸其姻
家長蘆鹽運司判官亦刺馬丹鈔四萬錠買鹽營利於
京師詔追理之癸巳立壽福會福隆禧崇祥四總管府
分奉祖宗神御殿秩正三品並隸太禧院忽刺台游兵
進逼南城令京城居民戶出壯丁一人持兵仗從軍士
乘城仍於諸門列甕貯水以防火燕鐵木兒及陽翟王
太平國王朵羅台等戰于檀子山之棗林唐其勢陷陣
殺太平死者蔽野餘皆宵遁遣撒敦追之弗及甲午命

有司市馬千匹賜軍士出征者脫脫木兒章吉與也先
捏合擊敵軍於良鄉南轉戰至瀘溝橋忽刺台被創據
橋而宿乙未燕鐵木兒率軍循北山而西趣良鄉諸將
時與忽刺台阿刺帖木兒等戰于瀘溝橋聲言燕鐵木
兒大軍至敵兵皆遁使者頒詔于甘肅至陝西行省行
臺官塗毀詔書械使者送上升都湘寧王八刺失里引兵
入冀寧殺掠吏民時太行諸關守備皆闕冀寧路來告
急敕萬戶和尙將兵由故關援之冀寧路官募民丁迎
敵和尙以兵爲殿殺獲甚衆會上都兵大至和尙退保
故關冀寧遂破丙申燕鐵木兒入朝賜宴興聖殿賑通

州被兵之家命速速等董度支芻粟中書省臣言上都
諸王大臣不思祖宗成憲惑於姦臣倒刺沙之言輒以
兵犯京畿賴陛下洪福王禪遂致潰亡生擒諸王孛羅
帖木兒及諸用事臣蒙古荅失雅失帖木兒等旣已明
正典刑宜傳首四方以示衆從之丁酉以縉山縣民十
人嘗爲王禪向導誅其爲首者四人餘杖一百七籍其
家貲妻子分賜守關軍士戊戌命湖廣行省平章政事
乞住調兵守歸峽左丞別薛守八番以禦四川軍諸將
追阿刺帖木兒等至紫荆關獲之送京師皆棄市己亥
幸大聖壽萬安寺謁世祖裕宗神御殿賜燕鐵木兒太

平王黃金印并降制書及賜玉盤龍衣珠衣寶珠金腰
帶海東白鶲青鶲各一河南行中書省行樞密院皆聽
便宜行事禿滿迭兒軍復入古北口燕鐵木兒引軍禦
之大戰于檀州南敗之其萬戶以兵萬人降禿滿迭兒
遂走還遼東使者頒詔於陝西行省行臺官焚詔書下
使者獄告于上都庚子以梁王王禪第賜諸王帖木兒
不花廷臣言保定萬戶張昌其諸父景武等旣受誅宜
罷其所將兵而奪其金虎符不許辛丑以同知樞密院
事脫脫木兒通政使也不倫並知樞密院事御史中丞
亦列赤爲御史大夫還給伯顏察兒朵朵家貲齊王月

魯帖木兒東路蒙古元帥不花帖木兒等以兵圍上都倒刺沙等奉皇帝竇出降梁王王禪遁遼王脫脫爲齊王月魯帖木兒所殺遂收上都諸王符印壬寅以宣徽使也先捏知行樞密院事宜宣徽副使章吉爲行樞密院副使與知樞密院事也速台兒等將兵西擊潼關軍中書省臣言野理牙舊以贓罪除名近復命爲太醫使臣等不敢奉詔帝曰往者勿咎比兵興之時朕已錄用其依朕命行之以張珪女歸也先捏癸卯以故徽政使失烈門妻賜燕鐵木兒以通州知州趙義能禦敵賜幣二匹也先鐵木兒軍至晉寧本路官皆遁甲辰晉邸及遼

王所轄路府州縣達魯花赤並罷免禁錮選流官代之
給淮東宣慰司銀字圓符命有司收將士所遺符印兵
仗賑糴京城米十萬石石爲鈔十五貫丙午中書省臣
言凡有罪者旣籍其家貲又沒其妻子非古者罪人不
孥之意今後請勿没人妻子制可丁未告祭于南郊以
中書平章政事塔失海涯爲大司農復以欽察台爲中
書平章政事侍御史玥璐不花爲中丞以度支芻豆經
用不足凡諸王駙馬來朝並節其給宿衛官已有廩祿
者及內侍宮人歲給芻豆皆權止之糴豆二十萬石於
瀕御河州縣以河間山東鹽課鈔給其直放還防河運

糧軍陝西兵至鞏縣黑石渡遂據虎牢我師皆潰儲仗悉爲所獲河南行省來告急戒有司修城壁嚴守衛雲南銀羅甸土官哀贊等來貢方物已酉別不花加太保落知樞密院事命刑部郎中大都前廣東僉事張世榮追理烏伯都刺家貲開居庸關陝西軍奪武關萬戶楊克忠等兵潰庚戌帝御興聖殿齊王月魯帖木兒諸王別思帖木兒阿兒哈失里那海罕及東路蒙古元帥不分遣使者檄行省內郡罷兵以安百姓以宦者伯帖木兒妻及奴婢田宅賜撒敦辛亥雲南徹里路土官刀賽

等來貢方物詔自今朝廷政務及籍沒田宅賜人者非
與燕鐵木兒議諸人不許奏陳以宦者米薛迷奴婢家
貲賜伯顏王子以河南江西湖廣入貢駕鵝太頗令減
其數以省驛傳以諸王火沙第賜燕鐵木兒繼母公主
察吉兒癸丑燕鐵木兒辭知樞密院事命其叔父東路
蒙古元帥不花帖木兒代之燕鐵木兒請以蒙古塔失
等三十人田宅賜徹里鐵木兒等三十人從之以所括
河北諸路馬四百匹給四宿衛阿塔赤二百匹給中宮
阿塔赤餘二千匹分牧於內郡覈上都倉庫錢穀御史
臺臣言近北兵奪紫荆關官軍潰走掠保定之民本路

官與故平章張珪子景武五人率其民擊官軍死也先
捏不俟奏聞輒擅殺官吏及珪五子珪父祖三世爲國
勲臣設使珪子有罪珪之妻女又何罪焉今旣籍其家
又以其女妻也先捏誠非國家待遇勲臣之意帝曰卿
等言是命中書革正之命御史臺擇人充各道廉訪司
官遣官賑良鄉涿州定興保定驛戶之被兵者甲寅罷
徽政院改立儲慶使司秩正二品平章政事速速明里
董阿並領儲慶司事鷹坊伯撒里河南行省左丞姚煥
並爲儲慶使元帥也速答兒執湘寧王八刺失里送京
師八刺失里及趙王馬扎罕諸王忽刺台承上都之命

各起所部兵南侵冀寧還次馬邑至是被執其所俘男女千人悉還其家遣使止江浙軍士之往潼關者就還鎮也先鐵木兒兵至潞州乙卯以倒刺沙宅賜不花帖木兒倒刺沙子濱皮宅賜斡都蠻內侍王伯顏宅賜唐其勢丙辰燕鐵木兒請以所沒逆臣赤斤鐵木兒家貲還其妻鐵木哥兵入鄧州丁巳毀顯宗室升順宗祔右穆第二室成宗祔右穆第三室武宗祔左昭第三室仁宗祔左昭第四室英宗祔右穆第四室加命燕鐵木兒爲答刺罕仍命子孫世襲其號燕鐵木兒請以河南平章曲列等二十三人田宅賜西安王阿刺忒納失里等

二十三人從之戊午詔諭廷臣曰凡今臣僚唯丞相燕
鐵木兒大夫伯顏許兼三職署事餘者並從簡省百司
事當奏者共議以聞或私任已意者不許獨請上都官
吏自八月二十一日以後擢用者並追收其制敕天下
僧道有妻者皆令爲民也先捏軍次順德令廣平大名
兩路括馬盜殺太尉不花初不花乘國家多事率衆剽
掠居庸以北皆爲所擾至是盜入其家殺之興和路當
盜以死罪刑部議以爲不花不道衆所聞知幸遇盜殺
而本路隱其殘剽之罪獨以盜聞於法不當中書以聞
帝嘉其議十一月己未詔諭中外曰諸王王禪及禿滿

迭兒阿刺不花禿堅等兵敗而逃有能擒獲者授五品
官同黨之人若能去逆効順擒王禪等來歸者免本罪
依上授官家奴獲之者得備宿衛敢有隱匿者事覺與
犯人同罪給殿中侍御史及冀寧路印凡內外百司印
因兵興而失者令中書如品秩鑄給之命太保伯荅沙
陞太傅兼宗正扎魯忽赤總兵北邊中書省臣言侍御
史左吉非才不當任風憲御史臺臣伯顏等言左吉御
史所薦若旣用之又以人言而止臺綱不能振矣必如
省臣所言臣等乞辭避帝曰汝等其勿爲是言左吉果
不可用省臣何不先言之其令左吉仍爲侍御史帝謂

中書省臣曰朕在瓊州建康時撤迪皆從備極艱苦其賜鹽引六萬俾規利以贍其家命郡縣招集被兵流亡之民貧者賑給之遼東降軍給行糧遣還京畿及四方民爲兵所掠而奴于人者令有司追理送還山北京東驛被兵者賑以鈔二萬一千五百錠放高麗官者米薛迷剛答里歸田里庚申中書錄用前御史臺官亦憐真蔡文淵用江南行臺御史王琚仁言汰近歲白身入官者敕行御史臺凡有糾劾必由御史臺陳奏勿徑以封事聞命中書省追理倒刺沙及其兄馬某沙子濬皮木八刺沙等家貲辛酉燕鐵木兒請以紐澤田宅賜欽察

台也先捏兵至武安也先鐵木兒以軍降河東州縣聞之盡殺其所署官吏癸亥帝宿齋宮甲子服袞冕享于太廟陝西兵進逼汴梁聞朝廷傳檄罷兵乃解去乙丑燕鐵木兒請以烏伯都刺等三十人田宅賜幹魯思等三十人從之丁卯伯顏兼忠翊侍衛都指揮使庚午復立察罕腦兒宣慰司命總宿衛官分簡所募勇士非舊嘗宿衛者皆罷去汴梁河南等路及南陽府頻歲蝗旱禁其境內釀酒日本舶商至福建博易者江浙行省選廉吏征其稅中書省臣言今歲旣罷印鈔本來歲擬印至元鈔一百一十九萬二千錠中綽鈔四萬錠監察御

史言戶部鈔法歲會其數易故以新期於流通不出其
數邇者倒刺沙以上都經費不足命有司刻板印鈔今
事旣定宜急收毀從之監察御史撒里不花鎖南八千
欽張士弘言朝廷政務賞罰爲先功罪旣明天下斯定
國家近年自鐵木迭兒竊位擅權假刑賞以遂其私綱
紀始紊迨至泰定爵賞益濫比以兵興用人甚急然而
賞罰不可不嚴夫功之高下過之重輕皆係天下之公
論願命有司務合公議明示黜陟功罪旣明賞罰攸當
則朝廷肅清紀綱振舉而天下治矣帝嘉納之辛未遣
西僧作佛事於興和新內鐵木哥兵入襄陽本路官皆

道襄陽縣尹谷庭珪主薄張德獨不去西軍執使降不屈死之時僉樞密院事塔海擁兵南陽不救壬申遣官告祭社稷以故平章黑驥平江田三百頃及嘉興蘆地賜西安王阿刺忒納失里癸酉八百媳婦國使者昭哀雲南威楚路土官脫放等九十九寨土官必也姑等各以方物來貢燕鐵木兒言向者上都舉兵諸王失刺樞密同知阿乞刺等十人南望宮闈鼓譟其黨拒命逆戰情不可恕詔各杖一百七流遠籍其家貲甲戌居泰定后雍吉刺氏于東安州杭州火命江浙行省賑被災之家乙亥賜西安王阿刺忒納失里齊王月魯帖木兒知

樞密院事不花帖木兒金各五百兩銀各二千五百兩
鈔各萬錠諸王朵列帖木兒金五十兩銀五百兩鈔千
錠從者及軍士有差丙子速速坐受賂杖一百七徙襄
陽以母年老詔留之京師丁丑以躬祀太廟禮成御大
明殿受諸王文武百官朝賀荆王也速也不干遣使傳
檄至襄陽鐵木哥引兵走戊寅以御史中丞玥不花
爲太禧使監察御史撒里不花等言玥不花素稟直
氣操履端正陛下欲振憲綱非任斯人不可乃復以玥
不花爲中丞兼太禧使作佛事于五臺寺命河南江
浙兩省以兵五萬益湖廣己卯中書省臣言內外流官

年及致仕者並依階敘授以制敕今後不須奏聞制可
以也先鐵木兒烏伯都刺珠衣賜撒迪趙世安諸衛漢
軍及州縣丁壯所給甲胄兵杖皆令還官庚辰遣使奉
迎皇兄明宗皇帝於漠北以中政院使敬儼爲中書平
章政事同知樞密院事徹里帖木兒爲中書左丞辛巳
遣欽察百戶及其軍士還鎮以脫脫等三人妻賜闊闊
出等三人以朶台等十一人田宅賜駙馬朶必兒等十
一人壬午第三皇子寶寧易名太平訥命大司農買住
保養於其家詔行樞密院罷兵還以御史中丞玥璘不
花爲中書右丞癸未倒刺沙伏誅磔其尸於市王禪亦

賜死馬某沙紐澤撒的迷失也先鐵木兒等皆棄市以所賜速速也先捏宅改賜駙馬謹只兒及乳媼也孫真甲申命威順王寬徹不花還鎮湖廣御史中丞趙世延以老疾辭職不許用故中丞崔彧故事加平章政事居前職御史臺臣言行宣政院行都水監宜罷從之丙戌作水陸會以阿魯灰帖木兒等六人在上都欲舉義不克而死並賜贈謚卹其家燕鐵木兒言晉王及遼王等所轄府縣達魯花赤旣已黜罷其所舉宗正府扎魯忽赤中書斷事官皆其私人亦宜革去從之敕趙世延及翰林直學士虞集製御史臺碑文遣諸衛兵各還鎮別

不花罷命有司追理上都官吏預借俸遼王脫脫之子
八都聚黨出剽掠敕宣德府官捕之四川行省平章囊
加台自稱鎮西王以其省左丞脫脫爲平章前雲南廉
訪使楊靜爲左丞殺其省平章寬徹等官稱兵燒絕棧
道烏蒙路教授杜巖肖謂聖明繼綱方內大寧省臣當
罷兵入朝庶免一方之害囊加台以其妄言惑衆杖一
百七禁錮之十二月己丑朔監察御史言伯顏宜與燕
鐵木兒一體論功行賞帝曰伯顏之功朕心知之御史
不必言庚寅令內外諸司天壽節聽具肉食民間禁屠
宰如舊制命通政院整飭蒙古驛諸關隘嘗毀民屋以

塞者賜民鈔俾完之甲午以王禪奴婢賜鎮南王鐵木兒不花及燕鐵木兒乙未以王禪弓矢賜燕鐵木兒伯顏燕鐵木兒請以馬某沙等九人田宅賜燕不隣等九人從之丙午幸大崇恩福元寺謁武宗神御殿分命諸僧於大明殿延春閣興聖宮隆福宮萬歲山作佛事雲南土官普雙等來貢方物御史臺臣言也先捏將兵所至擅殺官吏俘掠子女貨財詔刑部鞠之籍其家杖一百七竄于南寧命其妻歸父母家己亥造皇后玉冊玉寶庚子赦天下賜諸王滿禿爲果王阿馬刺台爲毅王宗正札魯忽赤闢闢出等十七人並賜功臣號及階官

爵謚仍命有司刻其功于碑賜鈔卹其家中書省臣言
陝西行省行臺官焚棄詔書坐罪當流雖經赦宥永不
錄用爲宜制可辛丑立龍翊侍衛親軍都指揮使司分
掌欽察軍士秩正三品指揮使三人命燕鐵木兒及卜
蘭奚卯罕爲之餘官悉聽燕鐵木兒選人以聞命高昌
僧作佛事於寶慈殿江南行臺御史言遼王脫脫自其
祖父以來屢爲叛逆蓋因所封地大物衆宜削王號處
其子孫遠方而析其元封分地詔中書與勲舊大臣議
其事火兒忽答等十三人從湘寧王入刺失里用兵旣
伏誅命皆籍其家貲西僧百人作佛事於徽猷閣七日

癸卯欽察阿速二部依宿衛軍士例給芻豆乙已伯顏
加大尉開府儀同三司與亦列赤並爲御史大夫同振
臺綱詔天下立內宰司隸儲慶使司秩正三品以阿伯
等六人田宅賜諸王老的等六人雲南姚州知州高明
來貢方物戊申以潛邸所用工匠百五十人付皇子阿
刺忒納答刺立異樣局以司之秩從六品加伯顏爲太
保知樞密院事不花帖木兒爲太尉香山爲司徒己酉
開上都酒禁壬子以諸路民匠提領所合爲提舉司秩
從五品甲寅復遣治書侍御史撒迪內侍不顏禿古思
奉迎皇兄於漠北西安王阿刺忒納失里及燕鐵木兒

鐵木兒補化請各遣人送名鷹於行在所以王禪妻金珠首飾歸中宮丙辰陞太禧院從一品中書左丞玥璐不花爲太禧使丁巳封西安王阿刺忒納失里爲豫王賜南康路爲食邑徹里鐵木兒陞右丞參知政事躍里鐵木兒爲左丞參議省事趙世安爲參知政事戊午詔被兵郡縣免雜役禁釀酒弛山塲河濼之禁私相假貸者俟秋成責償蒙古色目人願丁父母憂者聽如舊制御史臺言囊加台拒命西南罪不可宥所授制敕宜從追奪中書省臣言令方許囊加台等自新則御史言宜勿行從之教坊司達魯花赤撒刺兒在武宗時遙授參

知政事階中奉大夫詔落遙授之職而仍其舊階是月復遣使者召雲南行省左丞相也兒吉你又不至加謚唐司徒顏真卿正烈文忠公令有司歲時致祭陝西自泰定二年至是歲不雨大饑民相食杭州嘉興平江湖州鎮江建德池州太平廣德等路水沒民田萬四千餘頃河北山東有年

元史卷三十二

元史卷三十三

明翰林學士亞中大夫知制誥兼修國史宋濂等修

本紀第三十三

文宗二

天曆二年春正月己未朔立都督府以總左右欽察及龍翊衛庚申封知樞密院事火沙爲昭武王床兀兒之子答隣答里襲父封爲句容郡王高麗國遣使來朝賀遣前翰林學士承旨不答失里北還皇兄行在所仍命太府太監沙刺班奉金幣以往辛酉封朵列帖木兒復爲楚王高昌王鐵木兒補化爲中書左丞相大司農王

毅爲平章政事欽察台知樞密院事皇兄遣火里忽達
孫刺刺至京師以伯帖木兒扈從有功遣使以幣帛百
匹卽行在賜之諸王渾都帖木兒薨取其印及王傅印
以賜斡卽武寧王徹徹禿遣使來言皇兄啓行之期癸
亥燕鐵木兒爲御史大夫太平王如故賜魯國大長公
主鈔二萬錠營第宅甲子太白犯壘壁陣時享于太廟
齊王月魯帖木兒薨乙丑中書省言度支今歲芻稾不
足常例支給外凡陳乞者宜勿予從之仍命中書右丞
徹里帖木兒總其事丙寅帝幸大崇恩福元寺遣使賜
西域諸王燕只吉台海東鶻二戊辰遣使獻海東鶻于

皇兄行在所已已賜內外軍士四萬二千二百七十人
鈔各一錠作佛事陝西告饑賑以鈔五萬錠辛未以冊
命皇后告于南郊賜豫王黃金印回回人戶與民均當
差役中書省臣言近籍沒欽察家其子年十六請令與
其母同居仍請繼今臣僚有罪致籍沒者其妻其子他
人不得陳乞亦不得沒爲官口從之壬申遣近侍星吉
班以詔往四川招諭囊加台癸酉命中書省宣徽院臣
稽考近侍宿衛廩給定其名籍以遼陽省蒙古高麗肇
州三萬戶將校從逆舉兵犯京畿拘其符印制敕罷今
歲柳林田狩復鹽制每四百斤爲引引爲鈔三錠四川

囊加台乞師于鎮西武靖王搠思班搠思班以兵守關隘甲戌復命太僕卿教化獻海東鶻于皇兄行在所罷中瑞司丙子皇后媵臣張住童等七人授集賢侍講學士等官丁丑四川囊加台攻破播州貓兒埢隘宣慰使楊延里不花開闢納之陝西蒙古軍都元帥不花台者囊加台之弟囊加台遣使招之不花台不從斬其使中書省臣言朝廷賞賚不宜濫及罔功鷹鶻獅豹之食舊支內價二百餘錠今增至萬三千八百錠控鶴舊止六百二十八戶今增二千四百戶又佛事歲費以今較舊增多金千一百五十兩銀六千二百兩鈔五萬六千二

百錠幣帛三萬四千餘匹請悉揀汰從之中正院臣言
皇后日用所需鈔十萬錠幣五萬匹綿五千斤詔鈔予
所需之半幣給一萬匹賑大都路涿州房山范陽等縣
饑民糧兩月己卯以冊命皇后告于太廟庚辰賜潛邸
說書劉道衡等四人官從七品薛允等十六人官從八
品辛巳起復中書左丞史惟良爲御史中丞上都官吏
惟初入仕及驟陞者黜之餘聽敘復以御史臺贓罰鈔
三百錠賜教坊司撒刺兒壬午以陝西行臺御史大夫
阿不海牙爲中書平章政事皇兄遣常侍李羅及鐵住
訖先至京師賞以金幣居宅仍遣內侍禿教化如皇兄

行在所播州楊萬戶引四川賊兵至烏江峯官軍敗之
八番元帥脫出亦破烏江北岸賊兵復奪關口諸王月
魯帖木兒統蒙古漢人答刺罕諸軍及民丁五萬五千
俱至烏江癸未遣宣靖王買奴往行在所丙戌皇兄明
宗卽皇帝位於和寧之北四川襄加台焚鷄武關大橋
又焚棧道命中書省錄江陵汴梁郡縣官扈從者三十
四人並陞其階秩陝西大饑行省乞糧三十萬石鈔三
十萬錠詔賜鈔十四萬錠遣使往給之大同路言去年
旱且遭兵民多流殍命以本路及東勝州糧萬三千石
減時直十之三賑糴之奉元蒲城縣民王顯政五世同

居衛輝安寅妻陳氏河間王成妻劉氏冀寧李孝仁妻
寇氏濮州王義妻雷氏南陽鄭二妻張氏懷慶阿魯輝
妻翟氏皆以貞節並旌其門二月己丑曲赦四川囊加
台庚寅燕鐵木兒復爲中書右丞相立繕工司掌織御
用紋綺秩正三品辛卯帝御大明殿冊命皇后雍吉利
氏廣西思明路軍民總管黃克順來貢方物壬辰囊加
台據雞武關奪三叉柴關等驛癸巳遣翰林侍講學士
曹元用祀孔子於關里囊加台以書誘鞏昌總帥汪延
昌丙申命中書省翰林國史院官祀太祖太宗睿宗御
容于普慶寺丁酉遣晉邸部曲之在京師者還所部囊

加台以兵至金州據白工關陝西行省督軍禦之樞密院言囊加台阻兵四川其亂未已請命鎮西武靖王搠思班等皆調軍以湖廣行省官脫歡別薛李羅及鄭昂霄總其兵進討從之戊戌命察罕腦兒宣慰使撒忒迷失將本部蒙古軍會鎮西武靖王等討四川諸傭雇者主家或犯惡逆及侵損已身許訴官餘非干已不許告訐著爲制頒行農桑輯要及栽桑圖辛丑中書省議追尊皇后命有司具冊寶建遊皇城佛事雲南行省蒙通蒙算甸土官阿三木開南土官哀放八百媳婦金齒九

十九洞銀沙羅甸咸來貢方物癸卯賜吳王木楠子西
寧王忽答的迷失諸王那海罕闢兒吉思金銀有差丙
午囊加台分兵逼襄陽湖廣行省調兵鎮播州及歸州
己酉熒惑犯井宿辛亥帝謂廷臣曰撒迦還言大兄已
卽皇帝位凡二月二十一日以前除官者速與制敕後
凡銓選其詣行在以聞廬州路合肥縣地震壬子命有
司造行在帳殿癸丑諸王月魯帖木兒等至播州招諭
土官之從襄加台者楊延里不花及其弟等皆來降甲
寅立奎章閣學士院秩正三品以翰林學士承旨忽都
魯都兒迷失集賢大學士趙世延並爲大學士侍御史

撒迪翰林直學士虞集並爲侍書學士又置承制供奉
各一員更鑄鈔板仍毀其利者調河南江淛江西山東
兵萬一千及左右翼蒙古侍衛軍二千討四川乙卯置
銀沙羅甸等處宣慰司都元帥府丙辰奉元臨潼咸陽
二縣及畏兀兒八百餘戶告饑陝西行省以便宜發鈔
萬三千錠賑咸陽麥五千四百石賑臨潼麥百餘石賑
畏兀兒遣使以聞從之永平大同一路上都雲需兩府
貴赤衛皆告饑永平賑糧五萬石大同賑糴糧萬三千
石雲需府賑糧一月貴赤衛賑糧二月真定平山縣河
間臨津等縣大名魏縣有蟲食桑葉盡蟲俱死三月辛

酉遣燕鐵木兒奉皇帝寶于明宗行在所仍命知樞密
院事禿兒哈帖木兒御史中丞八卽刺翰林直學士馬
哈某典瑞使教化的宣徽副使章吉僉中政院事脫因
通政使那海太醫使呂廷玉給事中咬驢中書斷事官
忽兒忽答右司郎中李別出左司員外郎王德明禮部
尙書八刺哈赤等從行復命有司奉金千五百兩銀七
千五百兩幣帛各四百匹及金腰帶二十詣行在所以
備賜予帝命廷臣曰寶璽旣北上繼今國家政事其遣
人聞于行在所癸亥命有司造乘輿服御北迎大駕改
潛邸所幸諸路名建康曰集慶江陵曰中興瓊州曰乾

寧潭州曰天臨甲子減大官羊直丙寅躍里帖木兒自行在還諭旨曰朕在上都宗王大臣必皆會集有司當備供張上都積貯已爲倒刺沙所耗大都府藏聞亦悉虛供億如有不足其以御史臺司農司樞密宣徽宣政等院所貯克之蒙古饑民之聚京師者遣往居庸關北人給鈔一錠布一匹仍令興和路賑糧兩月還所部戊辰雲南諸王荅失不花禿堅不花及平章馬忽思等集衆五萬數丞相也兒吉尼專擅十罪將殺之也兒吉尼遁走八番荅失不花等僞署參知政事等官已已命改集慶潛邸建大龍翔集慶寺以來歲興工辛未監察御

史與扎魯忽赤等官錄囚壬申以去冬無雪今春不雨
命中書及百司官分禱山川羣祀設奎章閣授經郎二
員職正七品以勲舊貴戚子孫及近侍年幼者肄業甲
戌舊賜篤麟帖木兒平江田百頃官嘗收其租米詔特
予之開遼陽酒禁乙亥置行樞密院以山東都萬戶也
速台兒知行樞密院事與湖廣河南兩省官進兵平四
川也速台兒以病不往命明里董阿爲蒙古巫覡立祠
丁丑文獻昭聖皇后神御殿月祭特命如列聖故事僧
道也里可溫木忽合失蠻爲商者仍舊制納稅丙戌囊
加台所遣守隘碉門安撫使布荅思監等降於雲南行

省丁亥雨土霾夏四月己丑時享于太廟辛卯命蹕里
鐵木兒王不憐吉台代也速台兒討四川不憐吉台以
母老辭同僉樞密院事傅巖起請往從之壬辰匠官年
七十者許致仕浚漷州漕運河甲午四番衛士各分五
十人直東宮丁酉給鈔萬錠爲集慶大龍翔寺置永業
戊戌以陝西久旱遣使禱西嶽西鎮諸祠賜衛士萬三
千人鈔人八十錠四番衛士舊以萬人爲率至是增三
千人己亥湖廣行省參知政事李羅奉詔至四川赦囊
加台等罪囊加台等聽詔蜀地悉定諸省兵皆罷癸卯
明宗遣武寧王徹徹禿中書平章政事哈八兒禿來錫

命立帝爲皇太子命仍置詹事院罷儲慶司陝西諸路
饑民百二十三萬四千餘口諸縣流民又數十萬先是
嘗賑之不足行省復請令商賈入粟中鹽富家納粟補
官及發孟津倉糧八萬石及河南漢中廉訪司所貯官
租以賑從之德安府屯田饑賑糧千石常德澧州慈利
州饑賑糶糧萬石賑衛輝路饑民萬七千五百餘戶丙
午封孛羅不花爲鎮南王占臘國來貢羅香木及象豹
白猿戒翰林典瑞兩院官不許互相奏請璽書以護其
家諸王分邑達魯花赤受代不得仍留官所其父兄所
居官子弟不得再任辛亥賑鄧州諸縣被兵逃戶糧三

千六百石壬子賑通州諸縣被兵之民糧兩月被俘者
四千五百一十人命遼陽行省督所屬簿錄護送歸其
家丙辰行在所遣只兒哈郎等至京師河南廉訪司言
河南府路以兵旱民饑食人肉事覺者五十一人餓死
者千九百五十人饑者一萬七千四百餘人乞弛山林
川澤之禁聽民採食行入粟補官之令及括江淮僧道
餘糧以賑從之江淵行省言池州廣德寧國太平建康
鎮江常州湖州慶元諸路及江陰州饑民六十餘萬戶
當賑糧十四萬三千餘石從之諸王忽刺答兒言黃河
以西所部旱蝗凡千五百戶命賑糧兩月大都興和順

德大名彰德懷慶衛輝汴梁中興諸路泰安高唐曹冠
徐邳諸州饑民六十七萬六千餘戶賑以鈔九萬錠糧
萬五千石大都宛平縣保定遂州易州賑糧一月靖州
賑糴糧九千八百石濮州鄄城縣蠶災大寧興中州懷
慶孟州廬州無爲州蝗廣西獠寇古縣五月丁巳朔復
賜魯國大長公主鈔二萬錠以構居第賜燕鐵木兒祖
父紀功碑銘水達達路阿速古兒千戶所大水已未遣
翰林學士承旨阿鄰帖木兒北迎大駕命司天監榮星
昌王八刺失里還鎮庚申太白犯鬼宿積尸氣癸亥復
遣翰林學士承旨斡耳朶迎大駕乙丑命有司給行在

宿衛士衣糧及馬芻豆以儲慶司所貯金三十錠銀百
錠建大承天護聖寺給皇子宿衛之士千人鈔四番宿
衛增爲萬三千人至是又增千人甲戌命中書省臣擬
注中書六部官奏于行在所乙亥幸大聖壽萬安寺作
佛事于世祖神御殿又於玉德殿及大天源延聖寺作
佛事丙子武寧王徹徹禿中書平章政事哈八兒禿至
自行在所致立皇太子之命賜徹徹禿金五百兩餘有
差改儲慶使司爲詹事院伯顏鐵木兒補化及江南行
臺御史大夫阿兒思蘭海牙江淵行省平章政事曹立
並爲太子詹事又除副詹事詹事丞及斷事官家令司

典寶典用典醫等官丁丑帝發京師北迎明宗皇帝戊寅次于大口徵諸王鼎八入朝庚辰次香水園置江淮財賦都總管府秩正三品隸詹事院陝西行省言鳳翔府饑民十九萬七千九百人本省用便宜賑以官鈔萬五千錠又豐樂八屯軍士饑死者六百五十人萬戶府軍士饑者千三百人賑以官鈔百三十錠從之給保定路定興驛車馬又賑被兵之民百四十五戶糧一月真定路民被兵者二千七百四十八戶亦命賑之上都迭只諸位宿衛士及開平縣民被兵者並賑以糧大名路齷災六月丁亥朔明宗遣近侍馬駒塔台別不花至丁

西鐵木兒補化以旱乞避宰相位有旨諭之曰皇帝遠居沙漠未能卽至京師是以勉攝大位今亢陽爲災皆予闕失所致汝其勉修厥職祇修實政可以上答天變仍命馳奏于行在己亥江淲行省言紹興慶元台州婺州諸路饑民凡十一萬八千九十九戶乙巳命中書省逮繫也先捏以還丙午永平屯田府所隸昌國諸屯大風驟雨平地出水丁未太白晝見庚戌次于上都之六十店辛亥陝西行臺御史孔思迪言人倫之中夫婦爲重比見內外大臣得罪就刑者其妻妾卽斷付他人似與國朝旌表貞節之旨不侔夫亡終制之令相反况以失

節之婦配有功之人又與前賢所謂娶失節者以配身
是已失節之意不同今後凡負國之臣籍沒奴婢財產
不必罪其妻子當典刑者則孥戮之不必斷付他人庶
使婦人均得守節請著爲令壬子海運糧至京師凡百
四十萬九千一百三十石是月陝西雨賜鳳翔府岐陽
書院額書院祀周文憲王仍命設學官春秋釋奠如孔
子廟儀明宗遣吏部尚書別兒怯不花還京師命中書
集老臣議賑荒之策時陝西河東燕南河北河南諸路
流民十數萬自嵩汝至淮南死亡相藉命所在州縣官
以便宜賑之順元思播州諸驛因兵興馬多羸斃驛戶

貧乏令有司市馬補之益都莒密二州春水夏旱蝗饑民三萬一千四百戶賑糧一月陝西延安諸屯以旱免徵舊所逋糧千九百七十石永平屯田府昌國濟民豐贍諸署以蝗及水災免今年租汴梁蝗衛輝蠶災峽州旱淮東諸路歸德府徐邳二州大水秋七月丙辰朔日有食之丁巳次上都之三十里店宗仁衛屯田大水壞田二百六十頃戊午大都之東安薊州永清益津潞縣春夏旱麥苗枯六月壬子雨至是日乃止皆水災已未更定遷徙法凡應徙者驗所居遠近移之千里在道遇赦皆得放還如不悛再犯徙之本省不毛之地十年無

過則量移之所遷人死妻子聽歸土著著爲令征京師
僧道商稅癸亥太白經天丙子帝受皇太子寶辛巳發
諸衛軍六千完京城冀寧陽曲縣雨雹大者如雞卵令
諸王封邑達魯花赤推擇本部年二十五以上識達治
體廉慎無過者以充或有冒濫罪及王傅遣使以上尊
腊羊鈔十錠至大都國子監助仲秋上丁釋奠以淮安
海寧州鹽城山陽諸縣去年水免今年田租真定河間
汴梁永平淮安大寧廬州諸屬縣及遼陽之蓋州蝗八
月乙酉朔明宗次于王忽察都丙戌帝入見明宗宴帝
及諸王大臣于行殿庚寅明宗崩帝入臨哭盡哀燕鐵

木兒以明宗后之命奉皇帝寶授于帝遂還壬辰次孛羅察罕以伯顏爲中書左丞相依前太保欽察台阿兒思蘭海牙趙世延並中書平章政事甘肅行省平章朵兒只爲中書右丞中書參議阿榮太子詹事丞趙世安並中書參知政事前右丞相塔失鐵木兒知樞密院事鐵木兒補化及上都留守鐵木兒脫並爲御史大夫癸巳帝至上都乙未賜護守大行皇帝山陵官御史大夫李羅等鈔有差焚四川僞造鹽茶引丙申監察御史徐彊言天下不可一日無君神器不可一時而曠先皇帝奄棄臣庶已踰數日伏望聖上早正宸極以安億兆之

心實宗社無疆之福流諸王忽刺出于海南丁酉命阿
榮趙世安提調通政院事一切給驛事皆關白然後給
遣戊戌四川囊加台以指斥乘輿坐大不道棄市己亥
帝復卽位于上都大安閣大赦天下詔曰朕惟昔上天
啓我太祖皇帝肇造帝業列聖相承世祖皇帝旣大一
統卽建儲貳而我裕皇天不假年成宗入繼纔十餘載
我皇考武宗歸膺大寶克享天心志存不私以仁廟居
東宮遂嗣宸極甫及英皇降割我家晉邸違盟構逆據
有神器天示譴告竟隕厥身於是宗戚舊臣協謀以舉
義正名以討罪揆諸統緒屬在眇躬朕興念大兄播遷

朔漠以賢以長曆數宜歸力拒羣言至於再四乃日艱
難之際天位久虛則衆志弗固恐隳大業朕雖從請而
臨御秉初志之不移是以固讓之詔始頒奉迎之使已
遣尋命阿刺忒納失里燕鐵木兒奉皇帝寶璽遠迓于
途受寶卽位之日卽遣使授朕皇太子寶朕幸釋重負
實獲素心乃率臣民北迎大駕而先皇帝跋涉山川蒙
犯霜露道里遼遠自春徂秋懷艱阻於歷年望都邑而
增慨徒御弗慎屢爽節宣信使往來相望於道路彼此
思見交切於衷懷八月一日大駕次王忽察都朕欣瞻
對之有期獨兼程而先進相見之頃悲喜交集何數日

之間而宮車弗駕國家多難遽至於斯念之痛心以夜繼旦諸王大臣以爲祖宗基業之隆先帝付托之重天命所在誠不可違請卽正位以安九有朕以先皇帝奄棄方新摧怛何忍銜哀辭對固請彌堅執誼伏闕者三日皆宗社大計乃以八月十五日卽皇帝位于上都可大赦天下自天曆二年八月十五日昧爽以前罪無輕重咸赦除之於戲戡定之餘莫急乎與民休息不變之道莫大乎使民知義亦惟爾中外大小之臣各究乃心以稱朕意庚子命阿榮趙世安督造建康龍翔集慶寺辛丑立寧徽寺掌明宗宮分事壬寅以鈔萬錠幣帛二

千匹供明宗后八不沙費用陞奎章閣學士院秩正二
品更司籍郎爲羣玉署秩正六品癸卯幸世祖所御幄
殿祓祭禁凡送諸王駙馬恩賜者母受金幣犯者以贓
論或以衣馬爲贈者聽遣道士苗道一吳全節修醮事
于京師毛穎遠祭遁甲神于上都南屏山大都西山甲
辰命司天監及回回司天監崇星中書省臣言祖宗故
事卽位之初必恩賚諸王百官比因兵興經費不足請
如武宗之制凡金銀五錠以上減三之一五錠以下全
界之又以七分爲率其二分準時直給鈔制可遣欽察
台先還京師經理政務燕鐵木兒阿榮留上都監給恩

賚金幣以仁宗英宗潛邸宿衛士二百人還大都備直
宿乙巳立藝文監秩從三品隸奎章閣學士院又立藝
林庫廣成局皆隸藝文監賜御史中丞史惟良沛縣地
五十頃發諸衛軍浚通惠河丙子自庚子至是日晝霧
夜晴封牙納失里爲遼王以故遼王脫脫印賜之出官
米五萬石賑糴京師貧民丁未以馬扎兒台爲上都留
守馬扎兒台前爲陝西行臺侍御史坐塗毀詔書得罪
以其兄伯顏有功故特官之戊申封諸王寬徹爲肅王
己酉車駕發上都賜明宗北來衛士千八百三十人各
鈔五十錠怯薛官十二人各鈔二百錠賜諸部曲出征

者幣帛人各二匹遣還冀寧之忻州兵後荐饑賑鈔千
錠庚戌改詹事院爲儲政院伯顏兼儲政使中政使哈
撒兒不花太子詹事丞霄雲世月思前儲慶使姚煥並
儲政使河東宣慰使哈散託朝賀爲名斂所屬鈔千錠
入已事覺雖會赦仍徵鈔還其主敕自今有以朝賀斂
鈔者依枉法論罪癸丑徵吳王濬皮及其諸父木楠子
赴京師甲寅置隆祥總管府秩正三品總建大承天護
聖寺工役監察御史劾前丞相別不花昔以贓罷天曆
初因人成功遂居相位旣矯制以買驢家貲賜平章速
速又與速速等潛呼日者推測聖算今奉詔已釋其罪

宜竄諸海島以杜姦萌帝曰流竄海島朕所不忍其并
妻子置之集慶河南府路旱疫又被兵賑以本府屯田
租及安豐務遞運糧三月莒密沂諸州饑民採草木實
盜賊日滋賑以米二萬一千石并賑晉寧路饑民鈔萬
錠大名真定河間諸屬縣及湖池饒諸路旱保定之行
唐縣蝗加封大都城隍神爲護國保寧王夫人爲護國
保寧王妃九月乙卯朔作佛事于大明殿興聖隆福諸
宮市故宋太后全氏田爲大承天護聖寺永業戊午賜
武寧王徹徹禿金百兩銀五百兩西城諸王燕只吉台
金二千五百兩銀萬五千兩鈔幣有差已未立龍翔萬

壽營繕提點所海南營繕提點所並秩正四品隸隆祥
總管府庚申加封故領諸路道教事張留孫爲上卿大
宗師輔成贊化保運神德真君辛酉凡往明宗所送寶
官吏越次超陞者皆從黜降賑甘肅行省沙州察八等
驛鈔各千五百錠癸亥敕宣徽院所儲金銀鈔幣百司
毋得奏請甲子賜雲南烏撒土官祿余曲靖土官舉精
衣各一襲丁卯大駕至大都戊辰敕翰林國史院官同
奎章閣學士采輯本朝典故準唐宋會要著爲經世大
典召威順王寬徹不花赴闕敕使者頒詔赦率日行三
百餘里旣受命逗留三日及所至飲宴稽期者治罪取

賂者以枉法論辛未以控鶴士二十人賜宣靖王買奴
監察御史劾奏知樞密院事塔失帖木兒阿附倒刺沙
又與王禪舉兵犯闕今既待以不死而又付之兵柄事
非便詔罷之壬申怯薛官武備卿定住特授開府儀同
三司癸酉帝御大明殿受諸王百官朝賀鐵木迭兒諸
子鎖住等明宗嘗敕流于南方燕鐵木兒言鎖住天曆
初有勞于國請各遣還田里從之甲戌命江淵行省明
年漕運糧二百八十萬石赴京師廣西思明州土官黃
宗永遣其子來貢虎豹方物乙亥史惟良上疏言今天
下郡邑被災者衆國家經費若此之繁帑藏空虛生民

凋瘵此政更新百廢之時宜遵世祖成憲汰冗濫蠶食
之人罷土木不急之役事有不便者咸釐正之如此則
天災可弭禎祥可致不然將恐因循苟且其弊漸深治
亂之由自此而分矣帝嘉納之丙子改太禧院爲太禧
宗禋院立溫州路竹木場以衛輝路旱罷蘇門歲輸米
二千石鐵木兒補化加錄軍國重事以翰林學士承旨
也兒吉尼元帥梁國公都列捏並知行樞密院事立衛
候司秩正四品隸儲政院賑陝西臨潼等二十三驛各
鈔五伯錠論也先捏以不忠不敬伏誅嵐管臨三州所
居諸王八刺馬忽都火者等部曲乘亂爲寇遣省臺宗

正府官往督有司捕治之壬午伯顏以病在告居赤城
遣使召赴闕封知樞密院事燕不鄰爲興國公以大司
農卿燕赤爲司徒癸未建顏子廟于曲阜所居陋巷上
都西按塔罕闢干忽刺禿之地以兵旱民告饑賑糧一
月冬十月甲申朔帝服袞冕享于太廟丙戌命欽察台
兼領度支監遣鎮南王孛羅不花還鎮楊州禁奉元永
平釀酒戊子知樞密院事昭武王火沙知行樞密院事
己丑立大承天護聖寺營繕提點所秩正五品又立大
都等處平江等處田賦提舉司二秩從五品皆隸隆祥
總管府辛卯燕鐵木兒率羣臣請上尊號不許雲南行

省立元江等處宣慰司申飭海道轉漕之禁籍四川囊
加台家產其黨楊靜等皆奪爵杖一百七籍其家流遼
東封太禧宗禋使禿堅帖木兒爲梁國公甲午以登極
恭謝遣官代祀于南郊社稷中書省臣言舊制朝官以
三十月爲一考外任則三年爲滿比年朝官率不久於
其職或數月卽改遷於典制不類且治蹟無從考驗請
如舊制爲宜敕除風憲官外其餘朝官不許二十月內
遷調監察御史劾奏吏部尙書八刺哈赤先除陝西行
臺侍御史避難不行罷之丙申中書省臣言臣等謹集
樞密院御史臺翰林集賢院奎章閣太常禮儀院禮部

諸臣僚議上大行皇帝尊謚曰翼獻景孝皇帝廟號明宗國言謚號曰護都篤皇帝是日奉玉冊玉寶于太廟如常儀命江西湖廣分漕米四十萬石以紓江淛民力給鈔十五萬錠賑陝西饑民己亥加封天妃爲護國庇民廣濟福惠明著天妃賜廟額曰靈慈遣使致祭申飭都水監河防之禁辛丑遣使括勘內外郡邑官久次事故應代者歲終上名于中書省以怯憐口諸色民匠總管府及所屬諸司隸徽政院者悉隸儲政院發中政院財賦總管府糧儲在江南者赴京師以助經費驗時直以鈔還之諸王公主官府寺觀撥賜田租除魯國大長

公主聽遣人徵收外其餘悉輸於官給鈔酬其直壬寅弛陝西山澤之禁以興民大寧路地震癸卯命道士苗道一建醮于長春宮改瓊州軍民安撫司爲乾寧軍民安撫司陞定安縣爲南康州隸海北元帥府以南建洞主王官知州事佩金符領軍民監察御史劾奏張思明在仁宗朝阿附權臣鐵木迭兒間諜兩宮仁宗灼見其姦旣行黜降及英宗朝鐵木迭兒再相復援爲左丞稔惡不悛竟以罪廢今又冒居是官宜從黜罷詔罷之敕刑部尙書察民之無賴者懲治之甲辰畏兀僧百八人作佛事于興聖殿戊申以江淮財賦都總管府隸儲政

院供皇后湯沐之用作佛事于廣寒殿徵朵朵王士熙等十二人于貶所放還鄉里庚戌以親祀太廟禮成詔天下罷大承天護聖寺工役囚在獄三年疑不能決者釋之民間拖欠官錢無可追徵者盡行蠲免命通政院官分職往所在官司僉補逃亡驛戶大都至上海并塔思哈刺旭麥怯諸驛自備首思供給繁重天曆三年官爲應付免徵奉元路民間商稅一年命所在官司設置常平倉雲南八番爲囊加台所詐誤反側未安者並貰其罪免各處煎鹽竈戶雜泛夫役二年遣使代祀嶽瀆山川免永平屯田總管府田租申禁天下私殺馬牛明

宗乳媼夫幹耳朵在武宗時爲大司徒仁宗朝拘其印
燕鐵木兒以爲言詔給還之雲南威楚路黃州土官哀
放遣其子來朝貢湖廣常德武昌澧州諸路旱饑出官
粟賑糴之陝西鳳翔府饑民四萬七千戶皆賑以鈔十
一月乙卯以立皇后詔天下受佛戒於帝師作佛事六
十日丙辰以句容郡王荅鄰荅里知行樞密院事詔列
聖諸宮后妃陪從之臣永給衣廩芻粟后八不沙請爲
明宗資冥福命帝師率羣僧作佛事七日于大天源延
聖寺道士建醮于玉虛天寶太乙萬壽四宮及武當龍
虎二山戊午遣使代祀天妃賜燕鐵木兒宅一區皇后

以銀五萬兩助建大承天護聖寺冠州旱命采耳只亦都護爲河南行省丞相近制行省不設丞相中書省以爲言帝有旨采耳只先朝舊臣不當以例拘武宗宿衛士歲賜如仁宗衛士例西夏僧總統封國公冲卜卒其弟監藏班臧卜襲職仍以璽書印章與之癸亥以翰林學士承旨閻徹伯知樞密院事位居衆知院事上甲子廬州旱饑發糧五千石賑之止鷹坊母獵畿甸江西龍興南康撫瑞袁吉諸路旱丙寅陞山東河北蒙古軍大都督府秩從二品改普慶修寺人匠提舉司爲營繕提點所秩從五品隸崇祥總管府雲南威楚路土官昵放

來朝貢罷功德使司以所掌事歸宣政院己巳撒迪爲中書右丞命中書左丞趙世安提調國子監學庚午諸王闕不花至自陝西收其印遣還壬申毀廣平王木刺忽印命哈班代之更鑄印以賜癸酉太陰犯填星丙子諸王阿刺忒納失里翊戴有勞以其父越王禿刺印與之丁丑復立孟定路軍民總管府復給元江路軍民總管府印湖廣州縣爲廣源等猺寇掠者二百八十餘所命行省平章劉脫歡招捕之造青木綿衣萬領賜圍宿軍乙卯翰林國史院臣言纂修英宗實錄請具倒刺沙欵伏付史館從之高麗國王王燾久病不能朝請命其

子楨襲位以平江官田百五十頃賜大龍翔集慶寺及
大崇禧萬壽寺辛巳遷山東河北蒙古軍大都督府於
濮州仍聽山東廉訪司按治欽察台兼右都威衛使壬
午詔豫王阿刺忒納失里鎮雲南賜其衛士鈔萬錠仍
每歲豫給其衣廩十二月甲申給豳王忽塔忒迷失王
傅印以西僧輦真吃刺思爲帝師詔僧尼徭役一切無
有所與丙戌詔百官一品至三品先言朝政得失一事
四品以下悉聽敷陳仍命趙世安阿榮輯錄所上章疏
善者卽議舉行追封燕鐵木兒曾祖班都察爲溧陽王
祖土土哈爲昇王父床兀兒爲楊王庚寅祓祭于太祖

幄殿以末吉爲大司徒中書省臣言舊制凡有奏陳衆議定共署乃入奏近年事方議擬一二省臣輒已上請致多乖滯今請如舊制御史臺臣言風憲官赴任母拘遠近均給驛爲宜並從之辛卯命帝師率其徒作佛事於凝暉閣甲午冀寧路旱饑賑糧二千九百石乙未改封前鎮南王帖木兒不花爲宣讓王初鎮南王脫不花薨子李羅不花幼命帖木兒不花襲其爵李羅不花旣長帖木兒不花請以王爵歸之乃特封宣讓王以示褒寵收諸王帖古思金印詔諭廷臣曰皇姑魯國大長公主蚤寡守節不從諸叔繼尙鞠育遺孤其子襲王爵女

配予一人朕思庶民若是者猶當旌表況在懿親乎趙世延虞集等可議封號以聞詔諸僧寺田自金宋所有及累朝賜予者悉除其租其有當輸租者仍免其役僧還俗者聽復爲僧戊戌以淮濶山東河間四轉運司鹽引六萬爲魯國大長公主湯沐之資己亥遣使驛致故帝師舍利還其國給以金五百兩銀二千五百兩鈔千五百錠幣五千匹加謚漢長沙王吳芮爲長沙文惠壬寅命江瀾行省印佛經二十七藏癸卯蘄州路夏秋旱饑賑米五千石甲辰以明年正月武宗忌辰命高麗漢僧三百四十人預誦佛經二藏于大崇恩福元寺丁

未造至元鈔四十五萬錠中統鈔五萬錠如歲例中書
省臣言在京酒坊五十四所歲輸課十餘萬錠比者間
以賜諸王公主及諸官寺諸王公主自有封邑歲賜官
寺亦各有常產其酒課悉令仍舊輸官爲宜從之開河
東冀寧路四川重慶路酒禁罷土番巡捕都元帥府賑
上都留守司八刺哈赤二千二百餘戶燭刺赤八百餘
戶糧三月鈔有差牙連禿傑魯迭所居鷹坊八百七十
戶糧三月戊申以玥璣不花爲御史大夫兼領隆祥總
管府事庚戌詔興舉中政院事辛亥趣內外已授官者
速赴任改上都饅頭山爲天曆山壬子織武宗御容成

卽神御殿作佛事敕凡階開府儀同三司者班列居一
品之前武昌江夏縣火賑其貧乏者二百七十戶糧一
月黃州路及恩州旱並免其租是歲會賦入之數金三
百二十七錠銀千一百六十九錠鈔九百二十九萬七
千八百錠幣帛四十萬七千五百匹絲八十八萬四千
四百五十斤綿七萬六百四十五斤糧千九十六萬五
十三石

元史卷三十三

卷三十三

三

元史卷三十四

明翰林學士亞中大夫知制誥兼修國史宋濂等修

本紀第三十四

文宗三

至順元年春正月丙辰命趙世延趙世安領纂脩經世大典事懷慶路饑賑鈔四千錠丁巳賜明宗妃按出罕月魯沙不顏忽魯都鈔幣有差以知樞密院事伯帖木兒爲遼陽行省左丞相戊午頒璽書諭雲南辛酉時享太廟命回回司天監崇星壬戌中興路饑賑糶糧萬石貧者仍賙其家甲子燕鐵木兒伯顏並辭丞相職不允

仍命阿榮趙世安慰諭之丁卯雲南諸王禿堅及萬戶
伯忽阿禾怯朝等叛攻中慶路陷之殺廉訪司官執左
丞忻都等迫令署諸文牘庚午芍陂屯及鷹坊軍士饑
賑糧一月辛未中書省臣言科舉會試日期舊制以二
月一日三日五日近歲改爲十一十三十五請依舊制
從之壬申衡陽猺爲寇劫掠湘鄉州癸酉以宣徽使撒
敦復知樞密院事與欽察台並領長密卿乙亥賜燕鐵
木兒質庫一密海州文登牟平縣饑賑以糧三千石丙
子衡州路饑總管王伯恭以所受制命質官糧萬石賑
之丁丑追封三寶奴爲郢城王謚榮敏召荆王之子脫

脫木兒赴闕趙世延請致仕不允命中書省製玉帶二十賜臣僚官一品者遣使齎金千五百兩銀伍伯兩詣杭州書佛經賜海南大興龍普明寺鈔萬錠市永業地戊寅賜隆禧總管府田千頃立荆襄等處平松等處田賦提舉司並隸太禧宗禋院命陝西行省以鹽課鈔十萬錠賑流民之復業者猺賊八百餘人寇石康縣己卯封太醫院使野理牙爲秦國公庚辰陞羣玉署爲羣玉內司秩正三品置司尉亞尉僉司司丞仍隸奎章閣學士院禮部尚書夔夔兼監羣玉內司事辛巳改大都田賦提舉司爲宣農提舉司荆襄田賦提舉司爲荆襄濟

農香戶提舉司平江提舉司爲平江善農提舉司遣使
齎鈔三千錠往甘肅市髦牛濠州去年旱賑糧一月大
明路及江淵諸路俱以去年旱告永平路以去年八月
雹災告加封秦蜀郡太守李永爲聖德廣裕英惠王其
子二郎神爲英烈昭惠靈顯仁祐王二月壬午朔以趙
世安爲御史中丞史惟良爲中書左丞癸未加知樞密
院事燕不隣開府儀同三司籍張珪子五人家資乙酉
以西僧加瓦藏卜蘸八兒監藏並爲烏思藏土蕃等處
宣慰使都元帥雲南麓州等土官來貢方物楊州安豐
廬州等路饑以兩淮鹽課鈔五萬錠糧五萬石賑之真

定蘄黃等路汝寧府鄭州饑各賑糧一月丁亥命江南
陝西河南等處富民輸粟補官江南萬石者官正七品
陝西千五百石河南二千石江南五千石者從七品自
餘品級有差四川富民有能輸粟赴江陵者依河南例
其不願仕乞封父母者聽僧道輸已粟者加以師號徵
江淵江西湖廣賑糶糧價鈔赴京師己丑禿堅伯忽等
攻陷仁德府至馬龍州調八番元帥完澤將八番答刺
罕軍千人順元土軍五百人禦之庚寅改萬聖祐國興
龍普明龍翔萬壽三提點所並爲營繕都司秩正四品
萬安規運普慶營繕等八提點所並爲營繕司秩正五

品以脩經世大典久無成功專命奎章閣阿隣帖木兒
忽都魯都兒迷失等譯國言所紀典章爲漢語纂修則
趙世延虞集等而燕鐵木兒如國史例監修開元路胡
里改萬戶府軍士饑給糧賑之二月辛卯朔以御史臺
贓罰鈔萬錠金千兩銀五千兩付太禧宗禋院供祭祀
之需賜燕鐵木兒給驛璽書以徵其食邑租賦奎章閣
學士忽都魯都兒迷失撒迪虞集辭職詔諭之曰昔我
祖宗睿知聰明其於致理之道自然生知朕以統緒所
傳實在眇躬夙夜憂懼自惟早歲跋涉艱阻視我祖宗
旣乏生知之明於國家治體豈能周知故立奎章閣置

學士員日以祖宗明訓古昔治亂得失陳說於前使朕
樂於聽聞卿等其推所學以稱朕意其勿復辭帖麥赤
驛戶及建康廣德鎮江諸路饑賑糧一月衛輝江州二
路饑賑鈔二萬錠寧國路饑嘗賑糧二萬石不足復賑
萬五千石癸巳衛輝路胙城新鄉縣大風雨災甲午自
庚寅至是日京師大霜晝霽立諸色民匠抓捕鷹坊都
總管府秩正二品置奎章閣監書博士二人秩正五品
禿堅伯忽等攻晉寧州禿堅自立爲雲南王伯忽爲丞
相阿禾忽刺忽等爲平章等官立城柵焚倉庫以拒命
乙未中書省言江淛民饑今歲海運爲米二百萬石其

不足者來歲補運從之丙申雲南蒲蠻來朝賑常德澧州路饑丁酉帝及皇后燕王阿刺忒納答刺並受佛戒己亥命明宗皇子受佛戒監察御史言中書平章朵兒失職任台衡不思報效銓選之際紊亂綱紀貪污著聞恬不知恥黜罷爲宜從之猺賊入灌陽縣刦民財庚子以兵興所收諸王也先帖木兒搠思監等印還給之壬寅玥璐不花辭御史大夫職不允土蕃等處民饑命有司以糧賑之新安保定諸驛孳畜疫死命中書給鈔濟其乏癸卯汴梁路封丘祥符縣霜災甲辰流王禪之于吉陽軍乙巳封明宗皇子亦璘真班爲鄜王豫王阿

刺忒納失里所部千六百餘人饑賑糧二月淮安路民
饑以兩淮鹽課鈔五萬錠賑之丙午復以阿兒思蘭海
牙爲江南行臺御史大夫命中尚卿小云失以兵討雲
南御史臺臣言欽察台天曆初在上都常與闢闢出等
謀執倒刺沙事泄同謀者皆死欽察台以出征獲免頃
臺臣疑而劾之不稱事情宜雪其枉制曰可丁未以伯
顏知樞密院事依前太保錄軍國重事詔諭中書曰昔
在世祖嘗以宰相一人總領庶務故治出於一政有所
統今燕鐵木兒爲右丞相伯顏旣知樞密院事左丞相
其勿復置太禧宗禋院所隸總管府各置副達魯花赤

一人賜豫王王傳官金虎符戊申命中書省及翰林國
史院官祭太祖太宗睿宗三朝御容以太禧宗禋使阿
不海牙爲中書平章政事命史惟良及叅知政事和尚
總督建言之事中書省臣言舊制正旦天壽節內外諸
司各有贊獻頃者罷之今江湖省臣言聖恩公溥覆憲
無疆而臣等殊無補報凡遇慶禮進表稱賀請如舊制
爲宜從之降璽書申鹽法之禁以嘉興路崇德縣民四
萬戶所輸租稅供英宗后妃歲賜錢帛詔諭樞密院以
屯田子粒鈔萬錠助建佛寺免其軍卒土木之役庚戌
茶陵州民饑同知萬家奴江存禮以所受敕質糧三千

石賑之辛亥迤西蒙古驛戶饑給芻粟有差賑河南流
民復歸者鈔五千錠泰安州饑民三千戶真定南宮縣
饑民七千七百戶松江府饑民萬八千二百戶及王蕃
朵里只失監萬戶部內饑命所在有司從宜賑之濟寧
路饑民四萬四千九百戶賑以山東鹽課鈔萬錠杭州
火賑糧一月命市故瀛國公趙㬎田爲大龍翔集慶寺
永業御史臺臣言不必予其直帝曰吾建寺爲子孫黎
民計若取人田而不予直非朕志也察罕腦兒宣慰司
所部千戶察刺等衛饑者萬四千四百五十六人人給
鈔一錠三月甲寅命宣政院供顯懿莊聖皇后神御殿

祭祀乖西鰐蠻三千人入松梨山燒沿邊官軍營堡東平路須城縣饑賑以山東鹽課鈔安慶安豐蘄黃廬五路饑以淮西廉訪司贓罰鈔賑之丁巳徙封濟陽王木楠子爲吳王吳王潑皮爲濟陽王賜八番順元曲靖烏撒烏蒙蒙慶羅羅斯嵩明州土官幣帛各一禁泛濫給驛四川官吏脅從囊加台者皆復故職戊午封皇子阿刺忒納答刺爲燕王立宮相府總其府事秩正二品燕鐵木兒領之廷試進士賜篤列圖王文燁等九十七人及第出身有差命彰德路歲祭羨里周文王祠以河南行省平章乞住爲雲南行省平章八番順元宣慰使帖

木兒不花爲雲南行省左丞從豫王由八番道討雲南
賜明宗近侍七十人官有差裕宗及昭獻元聖皇后位
宿衛三千人命儲政院給其衣糧芻粟發米十萬石賑
糶京師貧民癸亥遣諸王桑哥班撒忒迷失買哥分使
西北諸王燕只吉台不賽因月卽別等所甲子詔諭中
外命御史大夫鐵木兒補化玥璐不花振舉臺綱丁卯
木八刺沙來貢蒲萄酒賜鈔幣有差以山東鹽課鈔萬
錠賑東昌饑民三萬三千六百戶己巳議明宗升祔序
于英宗之上視順宗成宗廟遷之例辛未羣臣請上皇
帝尊號不許固請不已乃許之封知樞密院事不花帖

木兒爲武平郡王錄討雲南禿堅伯忽之功雲南宣慰使土官舉宗祿余並遙授雲南行省叅知政事餘賜賚有差分龍慶州隸大都路諸王也孫台部七百餘人入天山縣掠民財產遣樞密院宗正府官往捕之壬申奉玉冊玉寶祔明宗神主于太廟濮州臨清館陶二縣饑賑鈔七千錠光州光山縣饑出官粟萬石下其直賑糴信陽息州及光之固始縣饑並以附近倉糧賑之甲戌封諸王速來蠻爲西寧王乙亥西番哈刺火州來貢蒲萄酒諸王駙馬還鎮錫賚有差丙子改山東都萬戶府爲都督府雲南木邦路土官渾都來貢方物河南登封

偃師孟津諸縣饑賑以兩淮鹽課鈔三萬錠鞏昌臨洮
蘭州定西州饑賑鈔三千五百錠沂莒膠密寧海五州
饑賑糧五千石中興峽州歸州安陸汎陽饑戶三十萬
有奇賑糧四月丁丑陞太常禮儀院秩正二品敕有司
供明宗后八不沙宮分幣帛二百匹及阿梯里脫忽思
幣帛有差賜燕鐵木兒功勲之碑廣平路饑以河間鹽
課鈔萬三千錠賑之辛巳諸王哈兒蠻遣使來貢蒲萄
酒廣德太平集慶等路饑凡數百萬戶濮州諸縣蟲食
桑葉將盡夏四月壬午朔命西僧作佛事于仁智殿自
是日始至十二月終罷癸未置怯憐口錢糧都總管府

秩正三品中書省臣言各宮分及宿衛士歲賜錢帛舊額萬人去歲增四千人邇者增數益廣請依舊額爲宜詔命阿不海牙裁省以聞甲申時享太廟丙戌封也真也不干爲桓國公燕鐵木兒言天曆初阿速軍士爲國有勞請以鈔十萬錠米十萬石分給其家從之戊子四川行省調重慶五路萬戶以兵救雲南庚寅中書省臣言邇者諸處民饑累常賑救去歲賑鈔百三十四萬九千六百餘錠糧二十五萬一千七百餘石今汴梁懷慶彰德大名興和衛輝順德歸德及高唐泰安徐邳曹冠等州饑民六十七萬六千戶一百一萬二千餘口請以

鈔九萬錠米萬五千石命有司分賑制曰可以陝西饑
敕有司作佛事七日壬辰以所籍張珪諸子田四百頃
賜大承天護聖寺爲永業沿邊部落蒙古饑民八千二
百人給鈔三錠布二匹糧二月遣還其所部癸巳置豫
王王傅副尉司馬各二員丁酉遣諸王桑兀孫還雲南
金蘭等驛馬牛死賑鈔五百錠庚子降璽書申諭太禧
宗禋院天臨之醴陵湘陰等州台州之臨海等縣饑各
賑糶米五千石辛丑明宗后八不沙崩壬寅括益都般
陽寧海閑田十六萬二千九十九頃賜大承天護聖寺爲
永業立益都廣農提舉司及益都般陽寧海諸提領所

並隸隆祥總管府烏蒙土官祿余殺烏撒宣慰司官吏降于伯忽羅羅諸蠻俱叛與伯忽相應平章帖木兒不花爲其所害晉寧建昌二路民饑賑糧五萬五千石鈔二萬三千錠戊申陝西行臺言奉元鞏昌鳳翔等路以累歲饑不能具五穀種請給鈔二萬錠俾分糴于他郡從之雲南賊祿余以蠻兵七百餘人拒烏撒順元界立關固守重慶五路萬戶軍至雲南境值羅羅蠻萬餘人遇害千戶祝天祥等引餘衆遁還詔江淵河南江西三省調兵二萬命諸王云都思帖木兒及樞密判官洪浹將之與湖廣行省平章脫歡會兵討雲南已酉作佛事

是月滄州高唐州屬縣蟲食桑葉盡芍陂屯饑賑糧二
月土蕃等處脫思麻民饑命有司賑之賑懷慶承恩孟
州等驛鈔千錠五月乙卯遣宣徽使定住等以受尊號
告祭南郊故四川行省平章寬徹四川道廉訪使忽都
魯養阿等皆爲囊加台所害並贈官賜謚榆次縣主簿
太帖木兒河中府判官禿塔兒皆爲遼東軍所害並加
褒贈戊午帝御大明殿燕帖木兒率文武百官及僧道
耆老奉玉冊玉寶上尊號曰欽天統聖至德誠功大文
孝皇帝是日改元至順詔天下河南懷慶衛輝普寧四
路曾經賑濟人戶今歲差發全行蠲免其餘被災路分

人民已經賑濟者腹裏差發江淮夏稅亦免三分己未
羅羅斯權土官宣慰撒加伯阿漏土官阿刺里州土官
德益叛附于祿余庚申以受尊號恭謝太廟辛酉四川
行省討雲南進軍至烏蒙壬戌歸德府之譙縣霧傷麥
癸亥四川軍至雲南之雪山峽遇羅羅斯軍敗之德州
饑賑以山東鹽課鈔三千錠武昌路饑賑以糧五萬石
鈔二千錠甲子申命燕鐵木兒爲中書右丞相詔天下
以鈔四萬錠分給宮人賜魯國大長公主鈔萬錠丁卯
陞尚舍寺秩正三品命阿鄰帖木兒爲大司徒遺豫王
翰林國史院修英宗實錄成戊辰車駕發大都次大口

阿刺忒納失里鎮西番授以金印賜諸王脫歡金印大
司徒不蘭奚銀印加趙世延翰林學士承旨封魯國公
賑衛輝大名廬州饑民鈔六千錠糧五千石開元路胡
里該萬戶府寧夏路哈赤千戶所軍士饑各賑糧二月
己巳次龍虎臺置肅王寬徹傅尉司馬各一員辛未置
宣忠扈衛親軍都萬戶府秩正三品總幹羅思軍士隸
樞密院以太禧宗禋使亦列赤爲中書平章政事左右
欽察龍翊侍衛軍士五千三百七十戶饑戶賑鈔二錠
布一疋糧一月癸酉遣使勞軍于雲南時諸王禿刺率
萬戶忽都魯沙怯列孛羅等皆領兵進討禿堅伯忽甲

戊八番乖西解苗阿馬察伯秩等萬人侵擾邊境詔樞密臣分兵討之乙亥置順元宣撫司統答刺斤軍征雲南人賜鈔五錠衛輝路之輝州以荒乏穀種給鈔三千錠俾糴於他郡己卯遣使詣五臺山作佛事庚辰命湖廣行省以鈔五萬錠給雲南軍需是月右衛左右手屯田大水害禾稼八百餘頃廣平河南大名般陽南陽濟寧東平汴梁等路高唐開濮輝德冠滑等州及大有干斯等屯田蝗以澍東宣慰使陳天祐湖廣叅知政事樊楫死於王事贈封特加一級龍興張仁興妻鄒氏奉元李郁妻崔氏以志節汴梁尹華以孝行皆旌其門六月

辛巳朔燕鐵木兒言嚮有旨惟許臣及伯顏兼領三職
今趙世延以平章政事兼翰林學士承旨奎章閣大學
士引疾以辭帝曰朕重老成人其令世延仍視事中書
果病無預銓選可也丙戌大駕至都戊子給左右欽
察龍翊侍衛軍士糧壬辰鎮江饑賑糧四萬石饒州饑
亦命有司賑之癸巳御史臺臣言宣徽院錢穀出納無
經以上供飲膳冒昧者多不稽其案牘則弊日滋宜如
舊制其實上之省部以備考覈從之丙申立行樞密院
討雲南賜給驛璽書十五銀字圓符五以河南行省平
章徹里鐵木兒知行樞密院事陝西行省平章探馬赤

近侍教化爲同知副使發朵甘思朵思麻及鞏昌諸處
軍萬三千人人乘馬三匹徹里鐵木兒同鎮西武靖王
搠思班等由四川教化從豫王阿刺忒納失里等由八
番分道進軍黃河溢大名路之屬縣沒民田五百八十
餘頃庚子以內侍中瑞卿撒里爲大司徒賜四川行省
左丞李羅金虎符以鹽課鈔二十萬錠供雲南軍需命
河南湖廣江西甘肅行省誦藏經六百五十部施鈔三
萬錠知樞密院事闢徹伯脫脫木兒通政使只兒哈郎
翰林學士承旨教化的伯顏也不干燕王宮相教化的
幹羅思中政使尚家奴禿烏台右阿速衛指揮使那海

察拜住以謀變有罪並棄市籍其家癸卯四川李羅以
蒙古漸丁軍五千往雲南乙巳羅羅斯土官撒加伯合
烏蒙蠻兵萬人攻建昌縣雲南行省右丞躍里帖木兒
拒之斬首四百餘級四川軍亦敗撒加伯于蘆古驛丙
午朵思麻蒙古民饑賑糧一月丁未改東路蒙古軍元
帥府爲東路欽察軍萬戶府是月高唐曹州及前後武
衛屯田水災大都益都真定河間諸路獻景泰安諸州
及左都威衛屯田蝗迤北蒙古饑民三千四百人人給
糧二石布二匹旌表真定梁子益妻李氏等貞節徐州
胡居仁孝行秋七月辛亥封諸王按渾察爲廣寧王授

以金印壬子命西僧榮星丙辰以闡徹伯大司徒印授
撒里丁已命中書省翰林國史院官祀太祖太宗睿宗
御容于大普慶寺命西僧爲皇子燕王作佛事西域諸
王不賽因遣使來朝賀監察御史請以所籍闡徹伯衣
物分賜宿衛軍士從之己未以闡徹伯宅賜太禧宗禋
院衣服賜羣臣通渭山崩壓民舍命陝西行省賑被災
者十二家庚申籍脫脫木兒家貲輸內府辛酉改哈思
罕萬戶府爲總管府秩四品詔僧道獵戶鷹坊合得璽
書者翰林院無得越中書省以聞真定路之平棘廣平
路之肥鄉保定路之曲陽行唐等縣大風雨雹傷稼許

失台速怯月謹真李可等部獻人口牧畜命酬其直江
西建昌萬戶府軍戍廣海者一歲更役來往勞苦詔仍
至元舊制二歲一更乙丑翰林學士承旨也兒吉尼知
樞密院事調諸衛卒築漷州柳林海子堤堰丙寅蒙古
百姓以饑乏至上都者闕口數給以行糧俾各還所部
增大都賑糶米五萬石大都之順州東安州大風雨雹
傷稼戊辰壽寧公主薨收其印已巳命江淛行省以鈔
十萬錠至雲南增其軍需庚午歲星犯氐宿開平路雨
雹傷稼中書省臣言近歲帑廩虛空其費有五日賞賜
日作佛事曰創置衙門曰濫冒支請曰續增衛士鷹坊

請與樞密院御史臺各怯薛官同加汰減從之御史臺
臣劾奏新除河南府總管張居敬避難不之官有旨免
所授官加其罪笞甲戌賜諸王養怯帖木兒孛樂台徵
棘斯察阿兀罕等金銀鈔幣有差丙子敕中書省御史
臺遣官詣江淵江西湖廣四川雲南諸行省遷調三品
以下官命四川行省於明年茶鹽引內給鈔八萬錠增
軍需以討雲南賑木鄰扎里至苦鹽泊等九驛每驛鈔
五百錠增給戍居庸關軍士糧海潮溢漂沒河間運司
鹽二萬六千七百餘引丁丑以給驛璽書五銀字圓符
二增給陝西蒙古都萬戶府以討雲南故丞相鐵木迭

兒子將作使鎖住與其弟觀音奴姊夫太醫使野理牙
坐怨望造符錄祭北斗呪咀事覺詔中書鞫之事連前
刑部尚書烏馬兒前御史大夫李羅上都留守馬兒及
野理牙姊阿納昔木思等俱伏誅雲南禿堅伯忽等勢
愈猖獗烏撒祿余亦乘勢連約烏蒙東川茫部諸蠻欲
令伯忽弟拜延順等兵攻順元樞密臣以聞詔卽遣使
督豫王阿納忒刺失里及行樞密院四川雲南行省亟
會諸軍分道進討以烏蒙烏撒及羅羅斯地接西番與
碉門安撫司相爲唇齒命宣政院督所屬軍民嚴加守
備又命鞏昌都總帥府調兵千人戍四川開元大同真

定冀寧廣平諸路及忠翊侍衛左右屯田自夏至于是
月不雨奉元晉寧興國楊州淮安懷慶衛輝益都般陽
濟南濟寧河南河中保定河間等路及武衛宗仁衛左
衛率府諸屯田蝗永平龐遵以孝行福州王薦以隱逸
大同李文實妻齊氏河南閻遂妻楊氏大都潘居敬妻
陳氏王成妻高氏以志節順德馬奔妻胡閨奴真定民
妻周氏冀寧民妻魏益紅以夫死自縊殉葬並旌其門
閏七月庚辰朔封諸王卯澤爲永寧王授金印及給銀
字圓符給驛璽書併以所隸封邑歲賦賜之癸未遣諸
王篤璘渾秃孛羅等共銀千兩幣二百匹賜諸王朶列

鐵木兒監察御史葛明誠言中書平章政事趙世延年
踰七十智慮耗衰固位苟容無補於事請斥歸田里臺
臣以聞詔令中書議之雲南茫部路九村夷人阿幹阿
里詣四川行省自陳本路舊隸四川今土官撒加伯與
雲南連叛願備糧四百石民丁千人助大軍進征事聞
詔嘉其去逆效順厚慰諭之衛士上都駐冬者所給糧
以三分爲率二分給鈔大駕將還敕上都兵馬司官二
員率兵士由偏嶺至明安巡邏以防盜賊市橐馳百牛
三百充扈從屬軍之用丙戌忠翊衛左右屯田隕霜殺
稼籍鎖住野里牙等庫藏田宅奴僕牧畜給大承天護

聖寺爲永業鑄黃金神仙符命印賜掌全真教道士苗道一己丑立掌醫署秩正五品庚寅以所籍野理牙宅爲都督府公署辛卯以陝西行臺御史中丞脫亦納爲中書參知政事燕鐵木兒言趙世延向自言年老屢乞致仕臣等以聞嘗有旨世延舊人宜與共政中書御史之言不知前有旨也帝曰如御史言世延固難任中書矣其仍任以翰林奎章之職四川行省平章汪壽昌言雲南伯忽叛逆興兵進討調遣餽餉皆壽昌領之頃以市馬造器械軍官俸給軍士行糧已給鈔十五萬錠今伯忽未及殄滅而烏撒烏蒙相繼爲亂大兵深入去朝

廷益遠元請軍需早乞頒降從本省酌其緩急便宜以行庶不稽誤從之寧夏奉元鞏昌鳳翔大同晉寧諸路屬縣隕霜殺稼癸巳以月魯帖木兒爲大司徒賜哈刺赤軍士鈔一萬錠糧十萬石察罕腦兒并東西涼亭諸衛士九百五十人人賜鈔五錠糧二月朔漠軍士人鈔三錠布二匹糧二月命燕鐵木兒以鈔萬錠分賜天曆初諸王羣臣死事之家行樞密院言征戍雲南軍士二人逃歸捕獲法當死詔曰如臨戰陣而逃死宜也非接戰而逃輒當以死何視人命之易耶其杖而流之丁酉大駕發上都授阿憐帖木兒大司徒印戊戌甘肅平章

政事乃馬台封宣寧郡王授以金印駙馬謹只兒封鄆國公授以銀印並知行樞密院事贈安南國王陳益稷儀同三司湖廣行省平章政事王爵如故諡忠懿益稷在世祖時自其國來歸遂授以國王卽居于漢陽府天曆二年卒至是加贈諡庚子魯王阿刺哥識里所部三萬餘人告饑賑鈔萬錠糧二萬石中書省臣言內外佛寺三百六十七所用金銀鈔幣不貲今國用不充宜從裁省命省人及宣政院臣裁減上都歲作佛事百五十五所定爲百四所令有司永爲歲例乙巳雲南使來報捷遣使賜雲南四川省臣行樞密院臣以上尊丙午諸

王卜顏帖木兒請給鞍馬願從諸軍擊雲南帝嘉其意
從之戊申加封孔子父齊國公叔梁紇爲啓聖王母魯
國太夫人顏氏爲啓聖王夫人顏子充國復聖公曾子
鄭國宗聖公子思沂國述聖公孟子鄒國亞聖公河南
伯程顥豫國公伊陽伯程頤洛國公羅羅斯土官撒加
伯及阿陋土官阿刺里州土官德益兵八千撤毀棧道
遣把事曹通潛結西番欲據大渡河進寇建昌四川行
省調碉門安撫司軍七百人成都保寧順慶廣安諸屯
兵千人令萬戶周戡統領直抵羅羅斯界以控扼西番
及諸蠻部又遣成都順慶二翼萬戶昝定遠等以軍五

于同印部知州馬伯所部蠻兵會周戡等從便道共討之發成都沙糖戶二百九十人防遏敘州徵重慶夔州逃士軍八百人赴成都廣西猺于國安率千五百人寇修仁荔浦等縣廣西元帥府發兵捕之賊衆潰走生擒國安大都太寧保定益都諸屬縣及京畿諸衛大司農諸屯水沒田八十餘頃杭州常州慶元紹興鎮江寧國諸路及常德安慶池州荊門諸屬縣皆水沒田一萬三千五百八十餘頃松江平江嘉興湖州等路水漂民廬沒田三萬六千六百餘頃饑民四十萬五千五百七十一餘戶詔江淵行省以入粟補官鈔三千錠及勸率富人

出粟十萬石賑之寶慶衡永諸處田生青蟲食禾稼冠
州郁世復大都趙祥及弟英以孝行旌其門大都愛祖
丁塔木漷州劉仲溫以輸米賑貧旌其門八月庚戌河
南府路新安汙池等十五驛饑疫人給粟馬給芻粟各
一月辛亥雲南躍里鐵木兒以兵屯建昌執羅羅斯把
事曹通斬之丁巳北邊諸王月卽別遣使來京師燕鐵
木兒由西道田獵未至詔以機務至重遣使趣召之已
未大駕至京師勞遣人士還營有言蔚州廣靈縣地產
銀者詔中書太禧院遣人蒞其事歲所得銀歸大承天
護聖寺辛酉以世祖是月生命京師率僧百七十人作

佛事七日御史臺臣請立燕王爲皇太子帝曰朕子尚幼非裕宗爲燕王時比俟燕帖木兒至共議之甲子忠州土官黃祖顯遣其子宗忠來朝獻方物乙丑遣使詣真定玉華宮祀睿宗及顯懿莊聖皇后神御殿戊辰太白犯氐宿壬申詔興舉蒙古字學中書省樞密院御史臺言臣等比奉旨裁省衛士今定大內四宿衛之士每宿衛不過四百人累朝宿衛之士各不過二百人鷹坊萬四千二十四人當減者四千人內饗九百九十四人怯薛當留者各百人累朝舊邸宮分饗人三千二百二十四人當留者千一百二十人賤臣怯憐口共萬人當

留者六千人其汰去者斥歸本部著籍應役自裁省之後各宿衛復有容匿漢南高麗人及奴隸濫充者怯薛官與其長杖五十七犯者與曲給散者皆杖七十七沒家貲之半以籍入之半爲告者賞仍令監察御史察之制可九月庚辰江淛行省言今歲夏秋霖雨大水沒民田甚多稅糧不滿舊額明年海運本省止可二百萬石餘數令他省補運爲便從之罷入粟補官例糴豆二十三萬石於河間保定等路冠恩高唐等州出馬八萬匹令諸路分牧之大寧路地震甲申授不蘭奚及月魯鐵木兒大司徒印史惟良辭中書左丞職不允命藝文監

以燕鐵木兒世家刻板行之命河南行省給湖廣行省
鈔四千錠爲軍需討雲南遼陽諸王老的蠻子台諸部
擾民敕樞密院宗正府及行省每歲遣官偕往巡問以
治其獄訟監察御史葛明誠劾奏遼陽行省平章哈刺
鐵木兒嘗坐贓被杖罪今復任以宰執控制東藩亦足
見國家名爵之濫黜罷爲宜從之丙戌印部州土官馬
伯嚮導征雲南軍有功以爲征進招討知本州事江西
湖廣蒙古軍進征雲南者人給鈔五錠雲南羅羅斯叛
與成都甚邇而成都軍馬俱進征雲南詔四川鄰境諸
王發藩部丁壯二千人戍成都廣源賊弗道閉覆寇龍

州羅回洞龍州萬戶府移文詰安南國其國回言本國
自歸順天朝恪共臣職彼疆我界盡歸一統豈以羅回
元隸本國遂起爭端此蓋邊吏生釁假閑覆爲名爾本
府宜自加窮治湖廣行省備其言以聞命龍州萬戶府
申嚴邊防已丑熒惑犯鬼宿辛卯賜陝西蒙古軍之征
雲南者三十人人鈔六錠監察御史朵羅台王文若言
嶺北行省乃太祖肇基之地武宗時太師月赤察兒爲
右丞相太傅答刺罕爲左丞相保安邊境朝廷遂無北
顧之患今天子臨御及命哈八兒禿爲平章政事其人
無正大之譽有鄙俚之稱錢穀甲兵之事懵無所知豈

能昭宣皇猷贊襄國政且以月赤察兒輩居於前而以斯人繼其後賢不肖固不待辯而明理宜黜罷制曰可癸巳白虹貫日置麓川路軍民總管府復立總管府於哈刺火州甲午熒惑犯鬼宿積尸氣封魏王阿木哥子阿魯於西靖王乙未以立冬祀五福十神太一真君御史臺臣劾奏前中書平章速速叨居台鼎專肆貪淫兩經杖斷一百七方議流竄幸蒙恩宥量徙湖廣不復畏法自守而乃攜妻娶妾濫污百端况湖廣乃屯兵重鎮豈宜居此乞屏之遠裔以示至公詔永竄雷州湖廣行省遣人械送其所丙申以魯國大長公主邸第未完復

給鈔萬錠命中書平章亦列赤董其役己亥以奎章閣
纂修經世大典命省院臺諸司以次宴其官屬以平江
等處官田五百頃賜魯國大長公主敕諸人非其本俗
敢有弟收其嫂子收庶母者坐罪壬寅覈實諸衛軍戶
物力賜魯國大長公主鈔萬錠命燕鐵木兒詣其邸第
送之丙午命西僧作佛事於大明殿史惟良復乞辭職
歸養允其請仍賜鈔二百錠丁未中書參知政事張友
諒爲左丞知樞密院事脫別台爲陝西行臺御史大夫
鐵里干木隣等三十二驛自夏秋不雨牧畜多死民大
饑命嶺北行省人賑糧二石至治初以白雲宗田給壽

安山寺爲永業至是其僧沈明琦以爲言有旨令中書省改正之敕有司繕治南郊齋宮遼陽行省水達達路自去夏霖雨黑龍宋瓦二江水溢民無魚爲食至是末魯孫一十五狗驛狗多餓死賑糧兩月狗死者給鈔補市之辰州萬戶圖格里不花母石抹氏以志節漳州龍溪縣陳必達以孝行並旌其門冬十月戊申朔降璽書申飭衍聖公崇奉孔子廟事賜雲南行省叅政忽都沙三珠虎符辛亥命湖廣行省給諸王云都思鐵木兒幣百匹以賞將士捕猺賊有功者壬子諸王大臣復請立燕王爲皇太子帝曰卿等所言誠是但燕王尚幼恐其

識慮未弘不克負荷徐議之未晚也立宣忠扈衛親軍
都萬戶營於大都北市民田百三十餘頃賜之戊午致
齋於大明殿已未遣亞獻官中書右丞相燕鐵木兒終
獻官貼木爾補化率諸執事告廟請以太祖皇帝配享
南郊庚申出次郊宮辛酉帝服大裘袞冕祀昊天上帝
于南郊以太祖皇帝配禮成是日大駕還宮甲子以奉
元驛馬瘠死命陝西行省給鈔三千錠補市之木納火
失溫所居諸牧人三千戶瀕黃河所居鷹坊五千戶各
賑糧兩月乙丑廣西猺賊寇橫州及永淳縣敕廣西元
帥府率兵捕之樞密院臣言每歲大駕幸上都發各衛

軍士千五百人扈從又發諸衛漢軍萬五千人駐山後蒙古軍三千人駐官山以守關梁乞如舊數調遣以俟來年從之辛未烏蒙路土官阿朝歸順遣其通事阿累等貢方物壬申御史臺臣言內外官吏令家人受財以其干名犯義罪止四十七解任今貪汚者緣此犯法愈多請依十二章計贓多寡論罪從之甲戌敕累朝宮分官署凡文移無得稱皇后止稱某位下娘子其委用官屬並由中書擬聞乙亥改打捕鷹坊總管府爲仁虞都總管府知樞密院事撒敦宣徽使唐其勢並賜答刺罕之號中書省臣言近討雲南已給鈔二十萬錠爲軍需

今費用已盡鎮西武靖王撫思班及行省行院復求鈔
如前數臣等議方當進討之際宜依所請給之制曰可
賜伯夷叔齊廟額曰聖清歲春秋祠以少牢遣使趣四
川雲南行省兵進討於是四川行省平章塔出引兵由
永寧左丞李羅引兵由青山茫部並進陳兵周泥驛及
祿余等戰殺蠻兵三百餘人祿余衆潰卽奪其關隘以
導順元諸軍時雲南行省平章乞住等俱失期不至十
一月庚辰命中書賑糴糧十萬石濟京師貧民辛巳御
史臺臣言陝西行省左丞怯列坐受人僮奴一人及鸚
鵡請論如律詔曰位至宰執食國厚祿猶受人生口理

宜罪之但鸚鵡微物以是論贓失於太苛其從重者議
罪今後凡饋禽鳥者勿以贓論著爲令癸未賑上都樂
河駐冬各宮分怯憐口萬五千七百戶糧二萬石甲申
熒惑退犯鬼宿命帝師率西僧作佛事內外凡八所以
是日始歲終罷丙戌太白犯壘壁陣中書省臣言至元
間安豐安慶廬州等路有未附籍戶千四百三十六世
祖命以其歲賦賜床兀兒後旣附籍所輸歲賦皆入官
別令萬億庫歲給以鈔二百錠今乞停所給鈔復以其
戶還賜床兀兒之子燕鐵木兒從之羅羅斯撒加伯烏
撒阿答等合諸蠻萬五千人攻建昌躍里鐵木兒等引

兵追戰于木托山下敗之斬首五百餘級賑襄鄧畏兀
民被西兵害者六十三戶戶給鈔十五錠米二石被西
兵掠者五百七十七戶戶給鈔五錠米二石廣西廉訪
司言今討叛猺各行省官將兵二萬人皆屯駐靜江遷
延不進曠日持久恐失事機詔遣使趣之知樞密院事
燕不懈請依舊制全給鷹坊芻粟使毋貧乏帝曰國用
皆百姓所供當量入爲出朕豈以鷹坊失所重困吾民
哉不從辛卯以閩閩台知樞密院事給山東鹽課鈔三
千錠賑曹州濟陰等縣饑民癸巳以臨江吉安兩路天
源延聖寺田千頃所入租稅隸太禧宗禋院戊戌立打

捕鷹坊紅花總管府於遼陽行省秩四品辛丑徵河南行省民間自實田土糧稅不通舟楫之處得以鈔代輸命陝西行省賑河州蒙古屯田衛士糧兩月甲辰命司天監榮星丙午恩州諸王按灰坐擊傷巡檢張恭杖六十七謫還廣寧王所部充軍役十二月戊申遣伯顏等以將立燕王阿刺忒納答刺爲皇太子告祭于郊廟己酉以董仲舒從祀孔子廟位列七十子之下國子生積分及等者省臺集賢院奎章閣官同考試中式者以等第試官不中者復入學肄業以粟十萬石米豆各十五萬石給河北諸路牧官馬之家宣忠扈衛幹羅思屯田

給牛種農具辛亥立燕王阿刺忒納答刺爲皇太子詔
天下甲寅西域軍士居永平灤州豐閏玉田者人給鈔
三錠布二匹糧兩月監察御史言昔裕宗由燕邸而正
儲位世祖擇耆舊老臣如王顥姚燧蕭軒等爲之師保
賓客今皇太子仁孝聰睿出自天成誠宜慎選德望老
成學行純正者俾之輔導於左右以宏養正之功實宗
社生民之福也帝嘉納其言詔龍翔集慶寺工役佛事
江南行臺悉給之戊午以十月郊祀禮成帝御大明殿
受文武百官朝賀大赦天下癸亥知樞密院事閣闈台
兼大都留守乙丑遣集賢侍讀學士珠遣詣真定以明

年正月二十日祀睿宗及后于玉華宮之神御殿丁卯
命西僧於興聖光天宮十六所作佛事癸酉詔宣忠扈
衛親軍都萬戶府凡立營司境內所屬山林川澤其鳥
獸魚鼈悉供內膳諸獵捕者坐罪甲戌御史中丞和尚
坐受婦人爲賂遇赦原罪監察御史言和尚所爲貪縱
有汚臺綱罪雖見原理宜追奪所受制命禁錮元籍終
其身臺臣以聞制可敕各行省凡遇邊防有警許令便
宜發兵事緩則驛聞賑龍慶州懷來縣前歲被兵萬一
千八百六十戶糧兩月冀寧路梁世明妻程氏中興路
伯顏妻阿迭的以志節大都宛平縣鄭珪以行義並旌

其門賑遼陽行省所居鷹坊戶糧一月

元史卷三十四

元史卷三十五

明翰林學士亞中大夫知制誥兼修國史宋濂等修

本紀第三十五

文宗四

二年春正月己卯御製奎章閣記行樞密臣言十一月仁德府權達魯花赤曲木糾集兵衆以討雲南首敗伯忽賊兵於馬龍州以是月十一日殺伯忽弟拜延獻馘於豫王十三日戰于馬金山獲伯忽及其弟伯顏察兒其黨拜不花卜顏帖木兒等十餘人誅之餘兵皆潰獨祿余猶據金沙江有旨趣進兵討之庚辰住持大承天

護聖寺僧寶峯加司徒辛巳大名魏縣民曹革輸粟賑
陝西饑旌其門癸未立侍正府以總近侍秩從二品乙
酉時享太廟丙戌伯顏月魯帖木兒玥璐不花阿卜海
牙等十四人並以本官兼侍正旌大都大興縣郭仲安
妻李氏貞節丁亥以壽安山英宗所建寺未成詔中書
省給鈔十萬錠供其費仍命燕鐵木兒撒迪等總督其
工役命後衛指揮使史塙往四川行省調軍官選戊子
命奴都赤阿里火者按行北邊牧地以晉郡部民劉元
良等二萬四千餘戶隸壽安山大昭孝寺爲永業戶中
書省臣言四川省臣塔出脫帖木兒等討雲南以十一

月九日領兵至烏撒周泥驛明日祿余阿奴阿答等賊
兵萬餘自山後間道潛出塔出脫帖木兒等進擊屢戰
敗之十五日又戰七星關六日凡十七戰賊大敗潰去
詔遣使以銀幣賞塔出脫帖木兒等造歲額鈔本至元
鈔八十九萬五十錠中統鈔五千錠給鈔五千錠賑寧
海州饑民罷益都等處廣農提舉司改立田賦總管府
秩從三品仍令隆祥總管府統之命興和路建燕鐵木
兒鷹棚樞密院臣言四川行省地鄰烏撒而雲南未平
今戍卒單少宜增兵防遏請調夔路怯憐口戶丁七百
重慶河東五路兩營兵三百同往戍之俟征進軍還日

悉罷遣從之庚寅改東路蒙古軍萬戶府爲東路蒙古
侍衛親軍指揮使司諸王哈兒蠻遣使來貢葡萄酒國
制累朝行帳設衛士給事如在位時近嘗汰其冗濫武
宗仁宗兩朝各定爲八百人英宗七百人中書省臣言
舊給事人有失職者詔復其百人辛卯皇太子阿刺忒
納答刺薨壬辰命宮相法里及給事者五十八人護靈
舉北祔葬于山陵仍令法里等守之御史臺臣劾奏福
建宣慰副使哈只前爲廣東廉訪副使貪汚狼籍宜罷
黜從之己亥遣吏部尚書撒里瓦佩虎符禮部郎中趙
期頤佩金符賚卽位詔告安南國且賜以授時曆賜武

寧王徹徹禿金百兩銀五百兩以淮安路之海寧州爲
其食邑癸卯以皇子古納答刺疹疾愈賜燕鐵木兒及
公主察吉兒各金百兩銀五百兩鈔二千錠撒敦等金
銀鈔各有差又賜醫巫乳媼宦官衛士六百人金三百
五十兩銀三千四百兩鈔五千三百四十錠甲辰敕每
歲四祭五福太一星建孔子廟于後衛至元末討諸王
乃顏之叛獲其部蒙古軍分置河南江浙湖廣江西諸
省命樞密院遣使括其數得二千六百人乙巳封蒙古
巫者所奉神爲靈感昭應護國忠順王號其廟曰靈祐
給衛士萬人歲例鈔人八十錠內以他物及粟折五之

一鎮西武靖王搠思班豫王阿刺忒納失里及行省行
院官同討雲南兵十餘萬以去年十一月十一日搠思
班師次羅羅斯期躍里鐵木兒俱至三泊郎仍趣小云
失會於曲靖馬龍等州同進兵躍里鐵木兒倍道兼進
奪金沙江十二月十七日大兵與阿禾蒙古軍相值戰
敗之阿禾僞降明日率其兵三千爲三隊來襲我營搠
思班躍里鐵木兒等分十三隊又擊敗之阿禾竄走大
兵直趣中慶二十六日遇賊黨蒙古軍於安寧州與再
戰又大敗之二十八日阿禾來逆戰遂就禽斬于軍前
三十日將抵中慶賊兵七千猶拒戰于伽橋古壁口兵

交躍里鐵木兒左頰中流矢洞耳後拔矢復與戰大捷
遂復行省治諸軍皆會駐于城中分兵追捕殘賊於嵩
明州樞密院臣以捷聞詔總兵官量度緩急從宜區處
新添安撫司壅河寨主訴他部猺獠蹂其禾民饑命湖
廣行省發鈔二千錠市米賑之二月丙戌以上都留守
乃馬台行嶺北行樞密院事太禧宗禋使謹只兒答鄰
答里馬烈捏四人並知院事遙授平章政事戊申立廣
教總管府以掌僧尼之政凡十六所曰京畿山後道曰
河東山右道曰遼東山北道曰河南荆北道曰兩淮江
北道曰湖北湖南道曰浙西江東道曰浙東福建道曰

江西廣東道曰廣西兩海道曰燕南諸路曰山東諸路
曰陝西諸路曰甘肅諸路曰四川諸路曰雲南諸路秩
正三品府設達魯花赤總管同知府事判官各一員宣
政院選流內官擬注以聞總管則僧爲之四川行省招
諭懷德府驢谷什用等四洞及生蠻十二洞皆內附詔
陞懷德府爲宣撫司以鎮之諸洞各設長官司及巡檢
司且命各還所掠生口湖廣叅政徹里帖木兒與速速
班丹俱坐出怨言鞫問得實刑部議當徹里帖木兒班
丹杖一百七速速處死會赦徹里帖木兒流廣東班丹
廣西速速徙海南皆置荒僻州郡有旨此輩怨望於朕

向非赦原俱當寘之極刑可俱籍其家速速禁錮終身
己酉白虹貫日旌輦昌金州民杜祖隆妻張氏志節樞
密院臣言徹里鐵木兒李羅以正月戊寅敗烏撒蠻兵
射中祿余降其民烏蒙東川易良州蠻兵夷獠等俱欵
附鎮西武靖王搠思班等駐中慶復行省事豫王阿刺
忒納失里等至當當驛安輯其人民又言澂江路蠻官
郡容報賊古刺忽及禿堅之弟必刺都迷失等僞降於
豫王而反圍之至易龍驛古刺忽等兵掩襲官軍四川
行省平章塔出頓兵不進平章乞住妻子孳畜爲賊所
掠謀知禿堅方修城堡布兵拒守無出降意詔速進兵

討之敕採馬赤軍士歲以五月十日遷處山後諸州辛亥建燕鐵木兒居第于興聖宮之西南詔撒迪及留守司董其役壬子太白晝見中書平章政事亦列赤兼瀋陽等路安撫使燕王宮相伯撒里爲中書平章政事陝西行臺中丞朵兒只班爲中書叅知政事戶部尚書高履亨兩淮都轉運鹽使許有壬並叅議中書省事甲寅燕鐵木兒言賽因怯列木丁英宗時嘗獻寶貨于昭獻元聖太后議給價鈔十二萬錠故相拜住奏酬七萬錠未給泰定間以鹽引萬六百六十道折鈔給之今有司以詔書奪之還官臣等議以爲寶貨太后旣已用之以

鹽引還之爲宜從之燕鐵木兒又言安慶萬戶鎖住坐令家人殺人繫獄久未歟伏宜若無罪乞釋之制曰可乙卯太白犯昴祀太祖太宗睿宗御容雲南統兵官來報捷諸蠻悉降唯祿余追捕未獲命番休各衛漢軍十之二以三月一日放遣丁巳駢馬不顏帖木兒自北邊從武寧王徹徹禿來朝已未命西僧爲皇子古納答刺作佛事一周歲壬戌改封武寧王徹徹禿爲鄭王賜以金印甲子中書省臣言國家錢穀歲入有額而所費浩繁是以不足天曆二年嘗以鹽賦十分之一折銀納之凡得銀二千餘錠今請以銀易官帑鈔本給宿衛士卒

又言陛下不用經費不勞人民創建大承天護聖寺臣等願上嚮所易鈔本十萬錠銀六百錠助建寺之需從之丙寅以太祖四大行帳世留朔方不遷者其馬駝孳畜多死損發鈔萬錠命內史府市以給之行樞密院都事阿里火者來報雲南之捷庚午給宿衛士歲例鈔詔母出定額萬人之外占城國遣其臣高暗都刺來朝貢創建五福太一宮于京城乾隅修上都洪禧崇壽等殿諸王徹徹禿沙哥坐妄言不道詔安置徹徹禿廣州沙哥雷州壬申命遼陽行省發粟賑國王朵兒只及納忽答兒等六部蒙古軍民萬五千戶旌大都民劉德仁妻

王氏貞節甲戌給宣讓王王傅印荆王也速也不干貢
犧牛命田賦總管府稅鑛銀輸大承天護聖寺命興和
路爲玥璐不花作鷹棚雲南景東甸蠻官阿只弄遣子
罕旺來朝獻馴象乞陞甸爲景東軍民府阿只弄知府
事罕旺爲千戶常賦外歲增輸金五千兩銀七百兩許
之以山東鹽課鈔萬錠賑膠州饑命龍翊衛以屯田歲
入粟贍衛卒孤貧者是月深冀二州有蟲食桑爲災三
月丙子朔熒惑犯鬼宿辛巳御史臺臣劾奏燕南廉訪
使卜咱兒前爲閩海廉訪使受贓計鈔二萬二千餘錠
金五百餘兩銀三千餘兩男女生口二十二人及它寶

貨無算雖遇赦原乞追奪制命籍沒流竄詔如所言仍
暴其罪示天下壬午賜南郊侍祠文武官金幣有差特
令沙津愛護持必刺忒納失里爲三藏國師賜玉印以
陝西鹽課鈔萬錠賑察罕腦兒蒙古饑民癸未割外府
幣帛各千匹輸之中宮以供需用甲申繪皇太子真容
奉安慶壽寺之東鹿頂殿祀之如累朝神御殿儀鞠宦
者拜住侍皇太子瘳疾飲食不時進以酥拭其眼鼻又
爲禳呪杖一百七斤出京城冠州有蟲食桑四十餘萬
株御史臺臣言奎章閣叅書雅琥阿媚奸臣所爲不法
宜罷其職從之丙戌雨土霾伯撒里辭所兼儲政使不

允伯顏娶諸王女賜金二百兩銀千兩賜上都死事者
不顏帖木兒等十一家鈔各百錠分賜燕鐵木兒鷹坊
百人中書省臣言宣課提舉司歲權商稅爲鈔十萬餘
錠比歲數不登乞凡僧道爲商者仍征其稅有旨誠爲
僧者其仍免之司徒香山言陶弘景胡笳曲有負屐飛
天曆終是甲辰君之語今陛下生年紀號實與之合此
實受命之符乞錄付史館頒告中外詔令翰林集賢奎
章禮部雜議之翰林諸臣議以謂唐開元間太子賓客
薛讓進武后鼎銘云上玄降鑑方建隆基爲玄宗受命
之符姚崇表賀請宣示史官頒告中外而宋儒司馬光

斥其采偶合之文以爲符瑞乃小臣之謗而宰相實之是侮其君也今弘景之曲雖於生年紀號若偶合者然陛下應天順人紹隆正統于今四年薄海內外罔不歸心固無待於旁引曲說以爲符命從其所言恐啓讖緯之端非所以定民志事遂寢趙王不魯納食邑沙淨德寧等處蒙古部民萬六千餘戶饑命河東宣慰發近倉糧萬石賑之又發山東鹽課鈔朱王倉粟賑登萊饑民興和倉粟賑保昌饑民戊子以西僧旭你迭八答刺班的爲三藏國師賜金印以龍慶州之流杯園池水礮土田賜燕鐵木兒命諸王阿魯出鎮陝西行省以籍入速

速班丹徹理帖木兒貲產賜大承天護聖寺爲永業浙
西諸路比歲水旱饑民八十五萬餘戶中書省臣請令
官私儒學寺觀諸田佃民從其主假貸錢穀自賑餘則
勸分富家及入粟補官仍益以本省鈔十萬錠并給僧
道度牒一萬道從之旌同知大都府事忙兀禿魯迷失
妻海迷失貞節已丑賑雲內州饑民及察忽涼樓戊兵
共七千戶庚寅命威順王寬徹不花還鎮湖廣癸巳詔
累朝神御殿之在諸寺者各製名以冠之世祖曰元壽
昭睿順聖皇后曰睿壽南必皇后曰懿壽裕宗曰明壽
成宗曰廣壽順宗曰衍壽武宗曰仁壽文獻昭聖皇后

曰昭壽仁宗曰文壽英宗曰宣壽明宗曰景壽召亳州
太清宮道士馬道逸汴梁朝天宮道士李若訥河南嵩
山道士趙亦然各率其徒赴闕修普天大醮賑浙西鹽
丁五千餘戶命玥璐不花作佛事於德興府監察御史
劾江浙行省平章童童荒失宴安才非輔佐詔免其官
豫王阿刺忒納失里鎮西武靖王搠思班等禽雲南諸
賊也木干羅羅脫脫木兒板不阿居澂江路總管羅羅
不花伯忽之叔怯得該僞署萬戶哈刺答兒及諸將校
悉斬之磔尸以徇賑遼陽境內蒙古饑民萬四千餘戶
旌山丹州郝榮妻李閨貞節陝州諸縣蝗八番軍從征

雲南者俱屯貴州樞密院臣請遣使發粟給之己亥御
史臺臣劾奏大都總管劉原仁稱疾久不視事及遷同
知儲政院事卽就職僥倖巧官避難就易有旨罷之庚
子以將幸上都命西僧作佛事於乘輿次舍之所壬寅
以欽察衛軍士增多析爲左右二衛給雲南行省鈔十
萬錠以備軍資民食癸卯御史臺臣劾奏工部尚書蘇
炳性行貪邪詔罷之大同路累歲水旱民大饑裁節衛
士馬芻粟自四月一日始壽王脫里出陽翟王帖木兒
赤西平王管不八昌王八刺失里等七部之民居遼陽
境者萬四千五百餘戶告饑命遼陽行省發近境倉糧

賑兩月命宣靖王買奴置王傅等官立宮相都總管府
秩正三品給銀印以儒學教授在選數多凡仕由內郡
江淮者注江西江浙湖廣由陝西兩廣者注福建由甘
肅四川雲南福建者注兩廣敷河南行省右丞那海提
督境內屯田中書省臣言嘉興平江松江江陰蘆塲蕩
山沙塗沙田等地之籍于官者嘗賜他人今請改賜燕
鐵木兒有旨燕鐵木兒非他臣比其令所在有司如數
給付發通州官糧賑檀順昌平等處饑民九萬餘戶以
山東鹽課鈔三千五百錠賑益都三萬餘戶是月陝西
行省遣官分給復業饑民七萬餘口行糧賑諸王伯顏

也不干部內蒙古饑民千餘口真定汴梁二路恩冠晉
冀深靈景獻等八州俱有蟲食桑爲災旌故戶部主事
趙野妻柳氏貞節夏四月丙午朔全寧民王脫歡獻銀
鑛詔設銀場提舉司隸中政院中書樞密臣言天曆兵
興諸領軍與敵戰者宜定功賞臣等議諸王各金百兩
銀五百兩金腰帶一織金等幣各十八匹諸臣四戰以
上者同三戰及一戰者各有差有旨賞格具如卿等議
燕鐵木兒首倡大義躬擐甲冑伯顏在河南先誅攜貳
使朕道路無虞兩人功無與比其賞不可與衆同其賜
燕鐵木兒七寶腰帶一金四百兩銀九百兩伯顏金腰

帶一金二百兩銀七百兩受賞者凡九十六人用金二
千四百兩銀萬五千六百兩金腰帶九十一副幣帛千
三百餘疋命西僧於五臺及霧靈山作佛事各一月爲
皇太子古訥荅刺祈福以糧五萬石賑耀京師貧民戊
申皇姑魯國大長公主薨以宮中高麗女子不顏帖你
賜燕鐵木兒高麗國王請割國中田爲資送詔遣使往
受之發衛卒三千助大承天護聖寺工役庚戌詔建燕
鐵木兒生祠於紅橋南樹碑以紀其勲御史臺臣言平
章政事曹立累任江浙今雖閑廢猶與富民交納宜遣
還其本籍大同路又監察御史萬家閭嘗薦中丞和尚

脫脫嘗舉廉訪使卜咱兒今和尚卜咱兒俱以贓罪除
名萬家閭脫脫難任臺省之職並從之真定武陟縣地
震逾月不止壬子命燕鐵木兒總制宮相都總管府事
也不倫伯撒里俱以本官兼宮相都總管府都達魯花
赤諸王哈兒蠻遣使來朝貢甲寅改宣忠扈衛親軍都
萬戶府爲宣忠幹羅思扈衛親軍都指揮使司賜銀印
中書省臣言越王禿刺在武宗時以紹興路爲食邑歲
割賜本路租賦鈔四萬錠今其子阿刺忒納失里襲王
號宜歲給其半從之乙卯時享太廟鎮西武靖王搠思
班等已平雲南各遣使來報捷諸王采列捏鎮雲南品

甸自以貲力給軍協力討賊詔以襲衣賜之丙辰葺太祖所御大行帳戊午以集慶路玄妙觀爲大元興崇壽宮命興和建屋居海青上都建屋居鷹鵠庚申特命河南儒士吳炳爲藝文監典簿仍予對品階寧國路涇縣民張道殺人爲盜道弟吉從而不加功居囚七年不決吉母老無他子孫中書省臣以聞敕免死杖而黜之俾養其母辛酉以山東鹽課鈔五千錠賑博興州饑民九千戶一千錠賑信陽等場鹽丁御史臺臣言儲政使哈撒兒不花侍陛下潛邸時受馬七十九疋又盜用官庫物天曆初領兵蘆溝橋迎敵卽逃擅閉城門驚惑民庶

度支卿納哈出嘗匿官馬又矯增制命又受諸王幹卽
七寶帶一鈔百六十錠臣等議其罪宜杖一百七除名
斥還鄉里從之壬戌樞密院臣言雲南事已平鎮西武
靖王搠思班言蒙古軍及哈刺章羅羅斯諸種人叛者
或誅或降雖已畧定其餘黨逃竄山谷不能必其不反
側今請留荆王也速也不干及諸王鎮南等各領所部
屯駐一二歲以示威重從之仍命豫王阿刺忒納失里
分兵給探馬赤三百乞赤伯三百共守一歲以鎮輯之
餘軍皆遣還所部統兵官召赴闕時已命探馬赤爲雲
南行省平章政事遂命總制境內軍事潞州潞城縣大

水癸亥諸王完者也不干所部蒙古民二百八十餘戶告饑命河東宣慰司發官粟賑之甲子陝西行省言終南屯田去年大水損禾稼四十餘頃詔蠲其租鎮寧王那海部曲二百以風雪損孳畜命嶺北行省賑糧兩月欽察台以名園爲獻命御史臺給贓罰鈔千錠酬其直諸王乞八言臣每歲扈從時巡爲費甚廣臣兄豫王阿刺忒納失里弟亦失班歲給鈔五百錠幣帛各五千匹敢視其例以請制可詔故尚書省丞相脫脫可視三寶奴例以所籍家貲還其家御史臺臣言同僉中政院事殷仲容姦貪邪佞冒哀居官詔黜之楊州泰興縣饑民

萬三千餘戶河南行省先賑以糧一月後以聞許之命
遼陽行省發粟賑寧羅部內蒙古饑民戊辰奎章閣以
纂修經世大典請從翰林國史院取脫卜赤顏一書以
紀太祖以來事蹟詔以命翰林學士承旨押不花塔失
海牙押不花言脫卜赤顏事關祕禁非可令外人傳寫
臣等不敢奉詔從之增置拱衛司儀仗命武備寺諸匠
官避元籍遣使召趙世延於集慶詔以泥金畏兀字書
無量壽佛經千部壬申散遣宣忠扈衛新籍軍士六百
人還鄉里期以七月一日還營衡州路屬縣比歲旱蝗
仍大水民食草木殆盡又疫癘死者十九湖南道宣慰

司請賑糧米萬石從之河中府蝗晉寧冀寧大同河間
諸路屬縣皆以旱不能種告饑甘州阿兒思蘭免古妻
忽都的斤以貞節旌其門五月丙子皇太子影殿造祭
器如裕宗故事敕建宮相都總管府公解丁丑熒惑犯
軒轅左角賜宮相都總管府給驛璽書調衛兵浚金水
河己卯安南世子陳日煌遣其臣段子貞來朝貢安慶
之望江縣淮安之山陽縣去歲皆水災免其田租丙戌
太禧宗禋院臣言累朝所建大萬安等十二寺舊額僧
三千一百五十人歲例給糧今其徒猥多請汰去九百
四十三人制可常德府桃源州去歲水災免其租丁亥

復立怯憐口提舉司仍隸中政院命樞密院調軍士修
京城己丑置雲南等處宣慰司都元帥府以土官昭練
爲宣慰使都元帥又置臨江元江等處宣慰司兼管軍
萬戶孟定路孟甸路並爲軍民總管府秩從三品者線
蒙慶甸銀沙羅等甸並爲軍民府秩從四品孟併孟廣
者樣等甸並設軍民長官司秩從五品益都路宋德讓
趙仁各輸米三百石賑膠州饑民九千戶中書省臣請
依輸粟補官例予官從之賑駐冬衛士二萬一千五百
戶糧四月庚寅立雲南省蘆傳路軍民總管府以土官
爲之制授者各給金符癸巳雲南威楚路之蒲蠻猛吾

來朝貢願入銀爲歲賦詔爲置散府一及土官三十三所皆賜金銀符甲午太白犯畢宿封宣政使脫因爲勦國公以平江官田五百頃立稻田提舉司隸宮相都總管府乙未以陝西行臺御史大夫脫別台知樞密院事御史大夫玥璐不花累辭職江南行省平章朵兒只以疾辭新任並許之脫忽思娘子繼主明宗幄殿詔賜湘潭州民戶四萬爲湯沐奎章閣學士院纂修皇朝經世大典成詔以泥金書佛經一藏丙申大駕幸上都四川行省平章汪壽昌辭職不允敕在京百司日集公署自晨及暮母廢事賑灤陽桓州李陵臺昔寶赤失兒禿五

驛鈔各二百錠桓州民以所種麥獻詔賜幣帛二匹慰
遣之戊戌次紅橋臨視燕鐵木兒生祠以太禧宗禋院
所隸昭孝營繕司隸崇禧總管府賑遼陽東路蒙古萬
戶府饑民三千五百戶糧兩月己亥也兒吉尼知行樞
密院事八番西蠻官阿馬路奉方物入貢高郵寶應等
縣去歲水免其租庚子太陰犯太白辛丑太白經天改
阿速萬戶府爲宣毅萬戶府賜銀印命伯顏領之旌濟
南章丘縣馬萬妻晉氏志節癸卯加也兒吉尼太尉賜
銀印以河間鹽課鈔四千錠賑河間屬縣饑民四千一
百戶甲辰詔通政院整治內外水陸驛傳宣政院臣言

舊制列聖神御殿及諸寺所作佛事每歲計二百十六
今汰其十六爲定式制可東昌保定二路濮唐二州有
蟲食桑寧夏紹慶保定德安河間諸路屬縣大水六月
乙巳朔徵儲政院鈔三萬錠給中宮道路之用敕河南
行省立阿不海牙政蹟碑監察御史韓元善言歷代國
學皆盛獨本朝國學生僅四百員又復分辨蒙古色目
漢人之額請凡蒙古色目漢人不限員額皆得入學又
監察御史陳守中言請凡仕者親老別無侍丁奉養不
限地方名次宜從優附近遷調庶廣忠孝之道皆不報
發米五千石賑興和屬縣饑民丁未太白晝見乙卯監

察御史陳良劾浙東廉訪使脫脫赤顏阿附權姦倒刺
沙其生母何氏本父之妾而兄妻之欺誑朝廷封溫國
夫人請黜罷憲職追還贈恩爲宜御史臺臣以聞從之
旌大都右警巡院胡德妻曹氏貞節壬戌以鈔萬五千
錠賑國王朵兒只等九部蒙古饑民三萬三百六十二
戶癸亥詔諸官吏在職役或守代未任爲人行賄闢說
卽有所取者官如十二章論贓吏罷不敘終其身雖無
所取訟起減由已者罪加常人一等甲子太府監頒宮
嬪閨宦及宿衛士行帳資裝免控鶴衛士當驛戶丙寅
雲南出征軍悉還烏撒羅羅蠻復殺戍軍黃海潮等撤

加伯又殺掠良民爲亂命雲南行省及行樞密院凡境上諸關戍兵未可輕撤宜視緩急以制其變丁卯太陰犯畢太白犯井庚午以揚州泰興江都二縣去歲雨害稼免今年租樞密院臣言征西萬戶府軍七百人自泰定以來累經優卹放還者四百五十人今邊防軍少例當迫使還營從之是月晉寧亦集乃二路旱濟寧路蟲食桑河南晉寧二路諸屬縣蝗大都保定真定河間東昌諸路屬州縣及諸屯水彰德路臨漳縣漳水決秋七月甲戌朔賜野馬川等處駐冬衛士衣藝文少監歐陽玄言先聖五十四代孫襲封衍聖公爵最五等秩登三

品而用四品銅印於爵秩不稱詔鑄從三品印給之德安府去年水免今年田租旌德安應山縣高可憲孝行已卯以雲南旣平惟祿余等懼罪竄伏降詔曲赦之辛巳只兒哈答兒坐罪當流遠以唐其勢舅氏故釋之壬午祀太祖太宗睿宗御容於翰林國史院監察御史張益等言欽察台在英宗朝陰與中政使咬住造謀誣告脫歡察兒將構異圖辭連潛邸致出居海南及天曆初倒刺沙據上都遣欽察台以兵拒命倒刺沙疑其有異志復禽以歸卽追言昔日咬住之謀以自解皇上卽位不念舊惡擢居中書而又自貽厥咎以致奪官籍產旋

復釋宥以爲四川平章今雲南未平與蜀接境其人反覆不可信任宜削官遠竄仍沒入其家產臺臣以聞詔奪其制命金符同妻孥禁錮于廣東母籍其家仍詔諭御史凡愴人如欽察台者其極言之母隱鐵木兒補化辭御史大夫職不允乙酉遣使代祀護國庇民廣濟福惠明著天妃命西僧於大都萬歲山憫忠閣作佛事起八月八日至車駕還大都日止丁亥海南黎賊作亂詔江西湖廣兩省合兵捕之諸王搠思吉亦兒甘卜哈兒蠻駙馬完者帖木兒遣使來獻蒲萄酒壬辰以知樞密院事脫別台爲御史大夫癸巳辰州興國二路蟲傷稼

免今年租甲午歸德府雨傷稼免今年租給諸衛士及蒙古戶糧四月乙未立閔子書院於濟南杭州火賑被災民百九十戶丁酉調甘州兵千人撤里畏兀兵五百人守參卜郎以防土番戊戌封伯顏爲浚寧王賜金印仍前太保知樞密院事高郵府去歲水災免今年租湖州安吉縣大水暴漲漂死百九十八人給鈔二十貫瘞之存者賑糧兩月庚子廣西徭賦平召諸王云都思帖木兒還辛丑懷德府洞蠻二十一洞田先什用等以方物來貢還所虜生口八百餘人給其家癸卯知行樞密院事徹里帖木兒以兵討叛蠻鎖力哈迷失戮其黨七

百餘人是月河南奉元屬縣蝗大都河間漢陽屬縣水
冀寧屬縣雨雹傷稼廬州去年水寧夏霜爲災並免今
年田租賑靈夏鳴沙蘭山二驛戶二百九十五定州新軍
戶千二百應理州民戶千三百糧各一月又賑龍興路
饑民九百戶糧一月大寧和衆縣何千妻柘都賽兒夫
亡以身殉葬旌其門八月甲辰朔日有食之封脫憐忽
禿魯爲靖恭王沙藍朵兒只爲懿德王並給以塗金銀
印西域諸王卜賽因遣使忽都不丁來朝灤陽驛戶增
置馬牛各一免其和市雜役賜上都孔子廟碑御史臺
臣劾奏宣徽副使桑哥比奉旨給宿衛士錢糧稽緩九

日玩法欺公罪當黜罷從之己酉以銀符二十八賜拱
衛直百戶命燕鐵木兒以鈔萬錠分賜蒙古孤寡者辛
亥大駕南還大都壬子西域諸王荅兒麻裏朶列帖木
兒之位遺諸王李兒只吉台等來朝貢甲寅雪別台之
孫月魯帖木兒買闥也先來獻失刺奴賜以金百兩銀
千五百兩鈔五百錠金帶一命宣課提舉司母收燕鐵
木兒邸舍商貨稅斡兒朶思之地頻年災畜牧多死民
戶萬七千一百六十命內史府給鈔二萬錠賑之乙卯
太白犯軒轅大星丙辰封內史怯列該爲豐國公以星
變令羣臣議赦丁巳命邠王不顏帖木兒圍獵於撫州

已未立鎮寧王總管府於撫州公主脫脫灰來朝以汴
梁路尉氏縣賜伯顏爲食邑詔刑部鞠內侍撒里不花
巫蠱事凡當死者杖一百七流廣東西中書省臣言明
年海運糧二百四十萬石已令江浙運二百二十萬河
南二十萬今請令江浙復增二十萬本省叅政杜貞督
領從之復命賑糶米五萬石濟京城貧民旌濟寧路魏
鐸孝行揚州路呂天麟妻韋氏貞節庚申太白犯軒轅
左角中書樞密臣言西域諸王不賽因其臣怯列木丁
矯王命來朝不賽因遣使來言請執以歸臣等議宗藩
之國行人往來執以付之不可宜令乘驛歸國以自辨

制可壬申陞侍正府秩正二品是月江浙諸路水潦害
稼計田十八萬八千七百三十八頃景州自六月至是
月不雨澧州泗州等縣去年水免今年租沅州饑賑糶
米二千石金州及西和州頻年旱災民饑賑以陝西鹽
課鈔五千錠九月癸酉朔市阿魯渾撒里宅命燕鐵木
兒奉皇子古納答刺居之中書省臣言今歲當飼馬駝
十四萬八千四百疋京城飼六萬疋餘令外郡分飼每
疋給芻粟價鈔四錠從之乙亥命留守司發軍士築駐
蹕臺于大承天護聖寺東御史臺臣劾奏四川行省叅
政馬鎔發糧六千石餉雲南軍中道輒還預借俸鈔一

十九錠以娶妾又詆罵平章汪壽昌罪雖蒙宥難任宰輔帝曰綱常之理尊卑之分懵無所知其何以居上而臨下亟罷之丙子太白犯填星樞密院臣言雲南東川路總管普折兒那具會祿余兵殺烏撒宣慰使月魯東川路府判教化的二十餘人又會伯忽姪阿福領蒙古兵將擊羅羅斯臣等與燕鐵木兒議遣西域指揮使鎖住等發陝西都萬戶府兵直抵羅羅斯發碉門安撫司兵絕大渡河直抵印部州巡守關隘詔宣政院亦遣使同往督之海南賊王周糾率十九洞黎蠻二萬餘人作亂命調廣東福建兵隸湖廣行省左丞移刺四奴統領

討捕之阿速及幹羅思新戍邊者命遼陽行省給其牛
具糧食己卯發粟五千石賑興和路鷹坊庚辰樞密院
臣言六月中行樞密院官以兵與烏撒賊兵五戰破之
惟祿余竄伏未獲命四川行省給其軍餉賑興和寶昌
州饑民米二千石御史臺臣言大聖壽萬安寺壇主司
徒嚴吉祥盜公物畜妻孥宜免其司徒壇主之職從之
禁諸驛母畜竄行馬免控鶴戶雜役湖州安吉縣久雨
太湖溢漂民居二千八百九十戶溺死男女百五十七
人命江浙行省賑卹之丁亥御史臺臣言江西行省叅
政李允中乃故內侍李邦寧養子器質庸下誤叨重選

宜黜罷從之庚寅幸大承天護聖寺以鈔五萬錠及預
貸四川明年鹽課鈔五萬錠給行樞密院軍需祿余寇
順元路癸巳罷供需府覆實司置廣誼司秩正三品以
右丞撒迪領其務御史臺臣劾太禧宗禋使童童淫侈
不潔不可以奉明禋又奎章閣監書博士柯九思性非
純良行極矯謗挾其末技趨附權門請罷黜之乙未以
金虎符賜中書平章政事亦列赤思州鎮遠府饑賑米
五百石丁酉雲南行省遣都事那海鎮撫欒智等奉詔
往諭祿余及授以叅政制命至撒家關祿余拒不不受俄
而賊大至那海因與力戰賊乃退及晚鳥撒兵入順元

境左丞帖木兒不花禦戰那海復就陣宣詔招之遂遇
害帖木兒不花等斂兵還壬寅改隆祥總管府爲隆祥
使司秩從二品冬十月甲辰遣秘書太監王珪等代祀
嶽鎮海瀆后土乙巳召行樞密院徹里鐵木兒小云失
還朝以前東川路總管普折子安樂襲其父職己酉時
享于太廟爲皇子古納答別作佛事釋在京囚死罪者
二人杖罪者四十七人辛亥召江南行臺御史大夫阿
兒思蘭海牙赴闕癸丑幸大承天護聖寺蒙古都元帥
怯烈引兵擊阿禾賊黨於靖江路海中山爲雲梯登山
破其柵殺賊五百餘人禿堅之弟必刺都古彖失舉家

赴海死又獲禿堅第二人子三人誅之甲寅杭州火命江浙行省賑其不能自存者丁巳中書省臣言江浙平江湖州等路水傷稼明年海漕米二百六十萬石恐不足若令運百九十九萬而命河南發三十萬江西發十萬爲宜又遣官齎鈔十萬錠鹽引三萬五千道於通漷陵滄四州優價和糴米三十萬石又以鈔二萬五千錠鹽引萬五千道於通漷二州和糴粟豆十五萬石以鈔三十萬錠往遼陽懿綿二州和糴粟豆十萬石並從之燒在京積年還倒昏鈔二百七十餘萬錠戊午詔還平江路大玉清昭應宮田百頃官勿徵其租已未給宿衛士

有官者芻豆諸王卜賽因使者還西域詔酬其所貢藥物價直辛酉命西僧作佛事於興聖宮十有五日乃罷吳江州大風雨太湖溢漂沒廬舍孳畜千九百七十家命江浙行省給鈔千五百錠賑之乙丑立昭功萬戶都總使府伯顏鐵木兒補化並兼昭功萬戶都總使丙寅命大都路定時佑每月朔望送廣誼司以酬物價燕鐵木兒取犛牛五千於西域來獻十一月壬申朔日有食之雲南行省言亦乞不薛之地所牧國馬歲給鹽以每月上寅日啖之則馬健無病比因伯忽叛亂雲南鹽不可到馬多病死詔令四川行省以鹽給之乙亥李彥通

蕭不蘭奚等謀反伏誅丙子封諸王幹卽爲保寧王賜以印以其先所受印賜諸王渾禿帖木兒之子庚兀台詔給移刺四奴分行省印丁丑興和路鷹坊及蒙古民萬一千一百餘戶大雪畜牧凍死賑米五千石戊寅樞密院臣言天曆兵興以揚州重鎮嘗假淮東宣慰司以兵權今事已寧宜以所部兵復隸河南行省又征西元帥府自泰定初調兵四千一百人戌龍刺亦集乃期以五年爲代今已十年逃亡者衆宜加優卹期以來歲五月代還並從之己卯封蘇班爲幽國公庚辰左右欽察衛軍士千四百九十戶饑命上都留守司賑之辛巳以

戶部尚書耿煥爲中書叅知政事癸未詔養燕鐵木兒之子塔刺海爲子賜居第及所籍李彥通貲產荆王也速也不干獻犧牛四百詔每歲樞密院宗正府遣官與遼陽行省官巡歷諸郡母令諸王所部擾民隆祥司使晃忽兒不花言海南所建大興龍普明寺工費浩穰黎人不勝其擾以故爲亂詔湖廣行省臣玥璐不花及宣慰宣撫二司領其役仍命廉訪司蒞之辛卯諸王撒兒蠻遣使者七十四人來賑左欽察衛撒敦等翼頃也兒古駐冬軍千五百八十戶諸鹽課鈔以十分之一折收銀銀每錠五十兩折鈔二十五錠乙未敕宮相都總管

府勿隸昭功都總使府丁酉以南陽府之嵩州更賜伯顏爲食邑十二月戊申陝西行臺御史捏古伯高坦等劾奏本臺監察御史陳良恃勢肆毒徇私破法請罷職籍贓還歸田里有旨雖會赦其准風憲例追奪勅命餘如所奏以黃金符鐫文曰翊忠徇義迪節同勲賜西域親軍副都指揮使欽察以旌其天曆初紅橋戰功壬子復命諸王忽刺出還鎮雲南癸丑撒敦獻幹羅思十六戶酬以銀百七錠鈔五千錠以河間路清池南皮縣牧地賜幹羅思駐冬仍以忽里所牧官羊給之河南河北道廉訪副使僧家奴言自古求忠臣必於孝子之門今

官於朝者十年不省覲者有之非無思親之心實由朝廷無給假省親之制而有擅離官次之禁古律諸職官父母在三百里於三年聽一給定省假二十日無父母者五年聽一給拜墓假十日以此推之父母在三百里以至萬里宜計道里遠近定立假期其應省覲匿而不省覲者坐以罪若詐冒假期規避以掩其罪與詐奔喪者同科御史臺臣以聞命中書省禮部刑部及翰林集賢奎章閣議之丁巳雨木冰戊午西域諸王秃列帖木兒遣使獻西馬及蒲萄酒預給四宿衛及諸潛邸衛士歲賜鈔人二十錠庚申遣集賢直學士荅失蠻詣真定

玉華宮祀睿宗及顯懿莊聖皇后神御殿辛酉遣兵部尚書也速不花同僉通政院事忽納不花迎帝師詔中書省御史臺遣官詣各道司廉訪司錄囚癸亥雨水冰給征東元帥府兵仗丁卯御史臺臣言甘肅行省平章月魯帖木兒旣非蒙古族姓且闇於事機使總兵柄恐非所宜詔樞密院勿令提調軍馬己巳御史臺臣言河東道廉訪副使忽哥兒不花僉燕南道廉訪司事不顏忽都王士元郝志善憲綱不振宜免官從之旌寧海州崔惟孝孝行是歲真定路屬州水冀寧河南二路旱大饑

元史卷三十五

元史卷三十五考證

文宗聖明元孝皇帝紀二年四月戊辰請從翰林國史院取脫卜赤顏一書○脫卜赤顏卽今之楚居注也

元史卷三十五考證